

ANTEPROXECTO

Lei reguladora da acción exterior e cooperación para o desenvolvemento de Galicia

ÍNDICE

Exposición de Motivos

Título preliminar

Artigo 1. *Obxecto*

Artigo 2. *Definicións*

Artigo 3. *Principios reitores*

Artigo 4. *Obxectivos estratéxicos*

Artigo 5. *Representación da Comunidade Autónoma de Galicia*

TÍTULO I. Suxeitos da acción exterior galega

CAPÍTULO I. Suxeitos públicos autonómicos

Artigo 6. *Suxeitos públicos cara ó exterior*

Artigo 7. *Outros suxeitos públicos cara ó exterior*

CAPÍTULO II. Suxeitos privados

Artigo 8. *Suxeitos privados concorrentes na acción exterior galega*

TÍTULO II. Programación da acción exterior galega

CAPÍTULO I. Estratexia galega de acción exterior (Egaex)

Artigo 9. *Inicio da programación*

Artigo 10. *Tramitación da Estratexia galega de acción exterior*

Artigo 11. *Información ao Parlamento de Galicia*

Artigo 12. *Aprobación da Egaex*

Artigo 13. *Execución da Egaex*

CAPÍTULO II. *Revisión da Egaex*

Artigo 14. *Revisión da Estratexia galega de acción exterior*

CAPÍTULO III. *Estratexia española de acción exterior*

Artigo 15. *Participación de Galicia na Estratexia española de acción exterior*

TÍTULO III. Aplicación da Egaex e coordinación da acción exterior galega

CAPÍTULO I. *Aplicación da Egaex*

Artigo 16. *Aplicación da Egaex*

Artigo 17. *Desenvolvemento sectorial da Egaex*

Artigo 18. *Programas de acción exterior doutras administracións públicas galegas e do sector público institucional*

CAPÍTULO II. *Viaxes oficiais ao exterior*

Artigo 19. *Transparencia das viaxes oficiais ao exterior*

CAPÍTULO III. *Recepción de autoridades oficiais procedentes do exterior*

Artigo 20. *Procedemento de recepción*

TÍTULO IV. Eurorrexión Galicia-Norte de Portugal e Lusofonía

Artigo 21. *Ámbito da Eurorrexión*

Artigo 22. *Comunidade de Traballo Galicia-Norte de Portugal*

Artigo 23. *A AECT da Eurorrexión*

Artigo 24. *Planificación estratéxica e programación de actuacións públicas de relevancia para a Eurorrexión*

Artigo 25. *Cooperación territorial e transfronteiriza galaico-portuguesa de base local*

Artigo 26. *Cooperación galaico-portuguesa no ámbito da Lusofonía*

TÍTULO V. Galicia en Europa

CAPÍTULO I. *Participación de Galicia nos asuntos da Unión Europea*

Sección 1ª. Participación na formación da vontade do Estado diante da UE

Artigo 27. *Conferencia para Asuntos Relacionados coa Unión Europea (CARUE)*

Artigo 28. *Do tratamento dos asuntos europeos nas conferencias sectoriais.*

Artigo 29. *Grupo de Traballo de Asuntos Europeos e Acción Exterior*

Sección 2ª. Participación en institucións e órganos da UE

Artigo 30. *Ámbito competencial*

Artigo 31. *Consello da Unión Europea*

Artigo 32. *Grupos de traballo do Consello da Unión Europea*

Artigo 33. *Comités da Comisión Europea*

Artigo 34. *Comité Europeo das Rexións (CER)*

Artigo 35. *Comité Económico e Social Europeo*

Artigo 36. *Tribunal de Xustiza da Unión Europea*

CAPÍTULO II. *Acción exterior en Europa fóra do marco xurídico da UE*

Artigo 37. *Fundamentos da acción exterior galega en Europa fóra da UE*

Artigo 38. *Participación en redes europeas de cooperación rexional*

TÍTULO VI. Tratados e outros instrumentos e acordos internacionais

CAPÍTULO I. *Negociación de tratados*

Artigo 39. *Participación por instancia galega en delegacións españolas no exterior e na negociación de tratados*

Artigo 40. *Participación galega por invitación estatal en delegacións españolas no exterior e na negociación de tratados*

CAPÍTULO II. *Execución de tratados*

Artigo 41. *Cooperación na execución de tratados*

Artigo 42. *Coordinación co Ministerio competente en asuntos exteriores para a execución de tratados*

CAPÍTULO III. *Acordos internacionais administrativos*

Artigo 43. *Acordo internacional administrativo por iniciativa galega*

Artigo 44. *Acordo internacional administrativo por iniciativa dunha autoridade exterior*

CAPÍTULO IV. *Acordos internacionais non normativos*

Artigo 45. *Acordo internacional non normativo por iniciativa galega*

Artigo 46. *Acordo internacional non normativo por iniciativa dunha autoridade exterior*

CAPÍTULO V. *Outros acordos de suxeitos públicos*

Artigo 47.- *Acordos de entidades públicas locais e de entidades non territoriais*

Artigo 48.- *Procedemento para a realización de acordos por entidades públicas locais e por entidades non territoriais*

CAPÍTULO VI. Comunicación e rexistro dos acordos internacionais

Artigo 49. *Comunicación, rexistro e depósito dos acordos*

CAPÍTULO VII. Memorandos de entendemento

Artigo 50. *Modelos de memorandos de entendemento*

TÍTULO VII. Accións sectoriais no exterior

CAPÍTULO I. Acción exterior no eido da Presidencia

Sección 1ª. Acción exterior en materia de emigración

Artigo 51. *Galegos do exterior*

Artigo 52. *Acción exterior en materia de retorno*

Sección 2ª. Emerxencias

Artigo 53. *Desprazamento ao exterior de equipos de protección civil ou emerxencias financiados por recursos públicos galegos*

Sección 3ª. Formación do persoal público

Artigo 54. *Formación de persoal empregado público en materias de interese europeo e internacional*

CAPÍTULO II. Acción exterior no eido de Facenda

Sección 1ª. Planificación económica

Artigo 55. *Consideración do entorno europeo e internacional na planificación económica*

Sección 2ª. Fondos da UE

Artigo 56. *Negociación, programación e xestión dos Fondos da UE a prol de Galicia*

CAPÍTULO III. Acción exterior medioambiental e cambio climático

Artigo 57. *Cooperación ambiental exterior*

CAPÍTULO IV. Acción exterior no eido da Mobilidade

Artigo 58. *Conectividade aérea internacional*

CAPÍTULO V. Acción exterior no eido da Economía

Sección 1ª. Comercio no Mercado Interior, comercio exterior e captación de investimentos e inmigrantes

Artigo 59. *Mercado Interior*

Artigo 60. *Comercio exterior*

Artigo 61. *Captación de investimentos produtivos.*

Artigo 62. *Captación de inmigrantes en países prioritarios*

Sección 2ª. Acción exterior no I+D+i

Artigo 63. *Polo de excelencia cara ó exterior*

Artigo 64. *Colaboración cara ó exterior*

Artigo 65. *Estratexia de especialización intelixente*

CAPÍTULO VI. Acción exterior no eido do ensino e da universidade

Sección 1ª. Ensino

Artigo 66. *Obxectivos europeos de cualidade*

Sección 2ª. Universidade

Artigo 67. *Internacionalización do Sistema Universitario Galego*

CAPÍTULO VII. Voluntariado social no exterior

Artigo 68. *Pulo do voluntariado social galego*

CAPÍTULO VIII. Acción exterior no eido da cultura, a lingua e o turismo

Artigo 69. *Cultura e lingua no exterior*

Artigo 70. *Turismo foráneo*

CAPÍTULO IX. Acción exterior no eido da Sanidade

Artigo 71. *Promoción de servizos sanitarios cara o exterior*

CAPÍTULO X. Acción exterior marítima

Artigo 72. *Defensa dos intereses do sector do mar no eido exterior*

TÍTULO VIII. Cooperación para o desenvolvemento

CAPÍTULO I. Disposicións xerais no eido da cooperación para o desenvolvemento

Artigo 73. *A política pública de cooperación para o desenvolvemento*

Artigo 74. *Ámbito de aplicación da cooperación para o desenvolvemento*

Artigo 75. *Principios da Cooperación Galega*

Artigo 76. *Obxectivos da Cooperación Galega*

Artigo 77. *Criterios da Cooperación Galega*

CAPÍTULO II. Planificación, modalidades, prioridades, avaliación, transparencia e rendición de contas da Cooperación Galega

Artigo 78. *Planificación da Cooperación Galega*

Artigo 79. *Modalidades da Cooperación Galega*

Artigo 80. *Prioridades da Cooperación Galega*

Artigo 81. *Xestión do coñecemento, avaliación, transparencia e rendición de contas da Cooperación Galega*

CAPÍTULO III . Organización institucional da Cooperación Galega

Artigo 82. *Consello da Xunta de Galicia e conselleiro competente en materia de cooperación para o desenvolvemento*

Artigo 83. *Centro directivo competente en materia de cooperación para o desenvolvemento*

Artigo 84. *Consello Galego de Cooperación para o Desenvolvemento*

CAPÍTULO IV. Recursos e financiamento da Cooperación Galega

Artigo 85. *Persoal da administración autonómica*

Artigo 86. *Recursos económicos*

Artigo 87. *Financiamento e control*

Artigo 88. *Réxime fiscal das achegas efectuadas a organizacións non gobernamentais para o desenvolvemento e a proxectos de cooperación para o desenvolvemento*

CAPÍTULO V. Axentes de cooperación

Artigo 89. *Axentes da cooperación para o desenvolvemento*

Artigo 90. *Obrigas dos axentes de cooperación para o desenvolvemento*

Artigo 91. *Entidades locais*

Artigo 92. *Organizacións non gobernamentais para o desenvolvemento*

Artigo 93. *Universidades do Sistema universitario galego e centros públicos de investigación*

Artigo 94. *Axencias das Nacións Unidas e os seus comités estatais, ou organizacións que as representen en España*

Artigo 95. *Cooperativas, empresas e asociacións empresariais*

Artigo 96. *Organizacións sindicais*

Artigo 97. *Comunidades galegas no exterior*

Artigo 98. *Outros axentes sociais ou entidades que teñan entre os seus fins a realización de actividades de cooperación para o desenvolvemento*

Artigo 99. *Rexistro galego de axentes de cooperación para o desenvolvemento*

CAPÍTULO VI . Outros suxeitos

Artigo 100. *Persoal cooperante*

Artigo 101. *Persoal voluntario no ámbito da cooperación para o desenvolvemento*

TÍTULO IX. Delegacións e oficinas públicas no exterior

CAPÍTULO I. Delegacións e oficinas públicas permanentes no exterior

Artigo 102. *Delegacións e oficinas exteriores autonómicas*

Artigo 103. *Funcionamento das delegacións exteriores da Xunta de Galicia*

CAPÍTULO II. Oficinas públicas temporais no exterior

Artigo 104. *Establecemento de oficinas autonómicas temporais no exterior*

Artigo 105. *Establecemento doutras oficinas públicas temporais no exterior*

TÍTULO X. Novas redes de intereses galegos no exterior

CAPÍTULO I. Asento de galegos no exterior

Artigo 106. *Asento de galegos no exterior*

Artigo 107. *Constitución de novas redes de galegos no exterior*

CAPÍTULO II. Empresas galegas no exterior

Artigo 108. *Identificación das empresas galegas no exterior e constitución de redes*

CAPÍTULO III. Rexistro de foráneos con intereses en Galicia

Artigo 109. *Rexistro de foráneos con intereses en Galicia*

Disposición adicional primeira. *Fundación Galicia Europa*

Disposición adicional segunda. *Apoios extraordinarios ás delegacións exteriores da Xunta de Galicia*

Disposición adicional terceira. *Participación do persoal do Servizo Galego de Saúde (Sergas) en emerxencias humanitarias baixo os parámetros do réxime do voluntariado sanitario internacional*

Disposición adicional cuarta. *Compromisos orzamentarios*

Disposición transitoria primeira. *Coeficientes por razón de servizo no exterior*

Disposición transitoria segunda. *Elaboración da primeira Estratexia galega de acción exterior tras a aprobación da presente Lei*

Disposición derogatoria única

Disposición derradeira primeira. *Habilitación normativa*

Disposición derradeira segunda. *Entrada en vigor*

Anteproxecto



EXPOSICIÓN DE MOTIVOS

1. Galicia é una nacionalidade histórica constituída como Comunidade Autónoma ao abeiro do previsto na Constitución española. Dende a aprobación do noso Estatuto de Autonomía pola Lei Orgánica 1/1981, do 6 de abril, sucedéronse fondos e substanciais cambios no Ordenamento xurídico español. Sen dúbida un dos máis relevantes foi o ligado á Adhesión de España ás Comunidades Europeas, consonte preveu a Lei Orgánica 10/1985, do 2 de agosto. Isto propiciou unha apertura sen precedentes de España ao exterior e co tempo posibilitou tamén cambios estruturais de enorme transcendencia, como a renuncia a emitir moeda propia, algo inimaxinable tan só uns anos atrás e que semellaba indisoluble da natureza de todo Estado soberano. Neste contexto, a doutrina do Tribunal Constitucional foi evolucionando paulatinamente ata asumir a proxección exterior das Comunidades Autónomas, sendo a galega unha das máis activas neste eido, por mor de fenómenos como o da nosa diáspora e a acelerada internacionalización da nosa economía, que nos elevou na clasificación de Comunidades exportadoras e expendedoras de bens e servizos.

2. A aprobación da Lei española 2/2014, do 25 de marzo, da Acción e do Servicio Exterior do Estado, axiña seguida pola Lei 25/2014, do 27 de novembro, de Tratados e outros Acordos Internacionais, abriu novas portas á proxección exterior autonómica. Con este aval, e dentro sempre da indispensable lealdade constitucional, a Xunta de Galicia aprobou o Decreto 178/2015, do 26 novembro, polo que se regula a acción exterior da Comunidade Autónoma de Galicia (DRAEX), comunicado ao Ministerio de Asuntos Exteriores e Cooperación, e asumido pola Administración Xeral do Estado, sendo hoxe pacífico o seu contido e alcance.

3. Cos devanditos alicerces xurídicos, o Consello da Xunta de Galicia aprobou o 1 de febreiro de 2018 a Estratexia Galega de Acción Exterior Horizonte post 2020 (Egaex), comunicada igualmente ao Ministerio de Asuntos Exteriores e Cooperación, previo informe sen ningún voto en contra do Parlamento de Galicia. Deste xeito, no punto 33 da Egaex incluíuse o compromiso de elevar ao debate parlamentario, e no marco competencial actual, o texto do DRAEX para a súa aprobación final mediante lei do Parlamento de Galicia ao longo da presente lexislatura, como expresión do gran consenso político que aspiramos a fraguar arredor da nosa acción exterior, proxección da capacidade de autogoberno dunha nacionalidade histórica como

Galicia. Con esta lei dáse cabal cumprimento daquela a ese compromiso parlamentario e con ela téntase aproveitar ao máximo a marxe de manobra no exterior que permiten o bloque da constitucionalidade e mais as precitadas leis 2/2014 e 25/2014, así como o Ordenamento da Unión Europea, que prevalece sobre a nosa normativa doméstica por mor das obrigas internacionais asumidas polo Reino de España, do que Galicia é parte indisociable.

4. A presente Lei reguladora da acción exterior e cooperación para o desenvolvemento de Galicia estrutúrase pois nun título preliminar e noutros dez títulos, catro disposicións adicionais, dúas disposicións transitorias, unha disposición derogatoria e dúas disposicións derradeiras. Con ela aspírase a configurar un marco xeral que posúe vocación de permanencia, a prol dunha acción exterior ao servizo da cidadanía, das entidades públicas, dos axentes e organizacións sociais e civís, así como das empresas galegas.

5. Consonte coa técnica normativa máis común da UE, o título preliminar recolle o obxecto da lei, oferta definicións auténticas dos conceptos xurídicos máis relevantes que insire, aglutina os seus principios reitores e define os obxectivos estratéxicos perseguidos, entre os que figuran a aproximación ao produto interior bruto *per cápita* da zona euro da Unión Europea, o achegamento aos estándares socioeconómicos, de cualidade de vida, demográficos e ambientais básicos da zona euro da Unión Europea, a meirande diversificación dos mercados exteriores, a captación de capital mercantil e industrial destinado a investimento produtivo, e mais a captación de capital humano cualificado para o máis acelerado desenvolvemento e consolidación económica de Galicia, que axude a paliar o avellentamento da nosa poboación pola caída da nosa natalidade, así como favorecer o retorno dos emigrantes galegos e dos seus descendentes.

6. O Título I versa sobre os suxeitos da acción exterior galega, tanto públicos como privados, observando como liña definitoria basal a establecida no Dereito da UE, logo incorporada ao Ordenamento xurídico español. Mención singular merece neste punto a Agrupación Europea de Cooperación Territorial “Galicia-Norte de Portugal” (GNP, AECT), dada a súa constitución ao abeiro dunha norma de aplicación directa en Portugal e España, como é o Regulamento (CE) nº 1082/2006 do Parlamento Europeo e do Consello, do 5 de xullo de 2006, modificado polo Regulamento (UE) nº 1302/2013. Esta Agrupación non é daquela unha entidade do sector público galego, senón un organismo bilateral con personalidade xurídica propia, constituído entre a Xunta de Galicia, autorizada polo Consello de Ministros español, e a República Portuguesa, a través neste caso da súa Comissão de Coordenação e Desenvolvimento Regional do Norte (CCDR-N).

7. O Título II ocúpase de xeito detallado do procedemento para realizar a Programación da acción exterior galega, positivizando e desenvolvendo pautas que

xa viñeran inseridas no DRAEX e na propia Egaex, sendo de especial relevancia a hipotética revisión desta Estratexia se as circunstancias internacionais así o esixiran, sen esquecer o xeito da participación galega na Estratexia española de acción exterior.

8. O Título III céntrase na aplicación da Egaex e na coordinación da acción exterior galega. Sublíñase aquí a conversión definitiva da Egaex no xenuíno eixo central da acción exterior galega, incluíndo como novidade fundamental a regulamentación das recepcións oficiais das autoridades públicas procedentes doutros Estados ou de organismos internacionais, aspecto sobre o que existía unha considerable lagoa no noso Ordenamento que cómpre encher, xa que estas visitas teñen igual ou, ás veces, máis relevancia xurídico-positiva que as viaxes ao exterior de delegacións galegas, dependendo do rango da cabeza da delegación e dos compromisos adquiridos en cada suposto.

9. A Eurorrexión Galicia-Norte de Portugal e mais a Lusofonía merecen todo o Título IV da lei, considerando o carácter estratéxico da nosa cada vez máis estreita cooperación coa República Portuguesa e cos países da súa comunidade lingüística. Tamén neste eido estase positivizando un pouso de usos e costumes bilaterais chantado dende a creación da Comunidade de Traballo Galicia-Norte de Portugal, constituída o 31 de outubro de 1991 ao abeiro do Acordo fundamentado no Convenio Marco Europeo sobre Cooperación Transfronteiriza entre Comunidades e Autoridades Territoriais, do Consello de Europa de 1980, hoxe adaptado ás disposicións do Tratado entre o Reino de España e a República Portuguesa sobre Cooperación Transfronteiriza entre Entidades e Instancias Territoriais, do 30 de outubro de 2002, cuxa entrada en vigor se produciu o 30 de xaneiro de 2004.

10. O Título V, Galicia en Europa, reúne no seu primeiro capítulo as cuestións relacionadas coa participación de Galicia nos asuntos da Unión Europea, mentres que reserva o seu segundo capítulo á acción exterior en Europa fóra do marco xurídico da UE, aspecto este a cotío preterido, pero que sen dúbida vai ter unha meirande importancia cando se materialice o abandono definitivo da Unión Europea polo Reino Unido de Gran Bretaña e Irlanda do Norte, considerando o peso e densidade das relacións económicas, sociais e culturais de Galicia con ese Reino.

11. O aproveitamento das potencialidades que permiten tanto a Lei española 2/2014, do 25 de marzo, da Acción e do Servicio Exterior do Estado, como de maneira fundamental a Lei 25/2014, do 27 de novembro, de Tratados e outros Acordos Internacionais, fai que no Título VI se aglutinen todas as materias vencelladas cos futuros tratados e outros instrumentos e acordos internacionais nos que poida intervir Galicia. Velaí como se diferencian con nidez aspectos indispensables en sede doméstica galega, como son a negociación de tratados, a execución en Galicia deses tratados, os acordos internacionais administrativos e

mais os acordos internacionais non normativos, a previsión doutros acordos de suxeitos públicos, a comunicación e rexistro dos acordos internacionais e, finalmente, a homologación dos memorandos de entendemento para harmonizar as iniciativas das entidades públicas galegas cara afora cando os correspondentes compromisos deban ser plasmados documentalmente en diversos idiomas.

12. Considerando a diversidade e pluralidade sectorial e institucional das iniciativas no exterior, no Título VII desta lei incorpóranse previsións sobre as correspondentes accións sectoriais alén de Galicia e España, sistematizadas por áreas homoxéneas. A especialidade deste Título non implica en modo algún unha derogación singular das previsións xerais inseridas no resto da lei, senón unha adecuación dos seus eidos substantivos aos principios e obxectivos básicos da norma.

13. O Título VIII dedícase en exclusiva á cooperación para o desenvolvemento, actualizando as previsións inseridas na homónima Lei 3/2003, do 19 de xuño, que pasa a ser explicitamente derogada. Búscase con el elevar a transcendencia desa cooperación, mais tamén a coordinación coa acción exterior clásica, ao se tratar dun puntal da proxección de Galicia fóra. A experiencia de máis de tres lustros na xestión da política de cooperación para o desenvolvemento permite agora incorporar solucións máis axeitadas para unha xestión que gañe en eficiencia a prol dos beneficiarios das diferentes iniciativas, sempre co concurso do sector civil da cooperación, que foi medrando na súa capitalización social entre a cidadanía galega.

14. No Título IX actualízase o relativo ás delegacións e oficinas públicas no exterior, adaptando as súas previsións á Lei 2/2014, do 25 de marzo, da Acción e do Servicio Exterior do Estado, coa finalidade primordial de mellorar a coordinación, minorar custes e reducir á mínima expresión as friccións co Ministerio competente, apostando sen ambaxes pola cooperación e desbotando toda confrontación estéril ou simplemente provocadora nesta materia.

15. A nova realidade da mobilidade internacional de profesionais e empresas, cada vez máis e mellor formados e capitalizadas, aconsellou innovar no Título X todo o relacionado coas novas redes de intereses galegos no exterior, que amosan un modelo de actuación á marxe das tradicionais comunidades galegas da nosa antiga diáspora. No caso das persoas físicas para garantir unha mellor atención pola Administración autonómica e para manter e estreitar os lazos subxectivos con Galicia, ante novos fenómenos que xa pouco teñen que ver coa realidade social e económica dos pasados dous séculos, estimando a inmediatez que fornecen as modernas telecomunicacións ou mesmo os novos medios de transporte. E, no caso das empresas, porque cómpre adaptarnos a unha realidade que esixe atender a demandas foráneas rapidamente cambiantes para, así, posibilitar a creación dunha

anovada oferta de traballo para uns cidadáns galegos mellor capacitados que nunca na nosa historia.

16. A Fundación Galicia Europa é merecedora pola súa banda dun tratamento singular na disposición adicional primeira, por canto ven prestando servizo ininterrompido dende 1988 e porque esta constituída, ademais de pola Xunta de Galicia, por diversas deputacións provinciais, pola Zona franca de Vigo e por entidades financeiras, sendo un exemplo vivo e único de cooperación entre diversas administracións públicas e de colaboración con entidades privadas galegas, algo que fica no mesmo espírito desta lei como desexable e necesario.

17. A disposición adicional segunda prevé a posibilidade de acadar apoios extraordinarios ás delegacións exteriores da Xunta de Galicia, nun intento de minimizar os custes de xestión no seu caso e de aproveitar o capital humano do propio sector público, pensando na existencia de picos de traballo e de necesidades puntuais que atender, sen por iso incrementar o gasto estrutural no capítulo de persoal.

18. Cun propósito similar, de optimización dos recursos humanos, a disposición adicional terceira abre a porta á participación do persoal do Servizo Galego de Saúde (Sergas) en emerxencias humanitarias, baixo os parámetros do réxime do voluntariado sanitario internacional, unha axuda impagable polo alto nivel de cualificación destes profesionais e pola necesidade de atender situacións extraordinarias de risco para a saúde pública que doutro xeito sería moi difícil poñer en marcha coa debida dilixencia.

19. Na disposición adicional cuarta insírese o horizonte de compromisos orzamentarios progresivos para a cooperación para o desenvolvemento, ligándoos á sustentabilidade financeira e aos escenarios orzamentarios plurianuais da nosa Comunidade Autónoma, por mor das prevalentes responsabilidades asumidas.

20. Pola súa banda, a disposición transitoria primeira mantén que en tanto non se regulen os coeficientes por razón de servizo que poidan corresponder ao persoal da Xunta de Galicia por residencia no estranxeiro, aplicaranse supletoriamente os establecidos no ámbito da Administración Xeral do Estado.

21. Resulta ademais indispensable prever como poñer en marcha unha nova Egaex logo de entrar en vigor esta lei, e daquela a disposición transitoria segunda obriga ao ulterior Executivo galego a que esa nova Egaex sexa aprobada dentro da seguinte lexislatura, evitando unha prórroga *sine die* da Egaex hoxe operativa.

22. A disposición derogatoria única pon termo expresamente á Lei 3/2003, do 19 de xuño, de cooperación para o desenvolvemento, que fora novedosa e moi avanzada no seu día, pero que xa cumpriu o seu ciclo, sendo demandada polas

organizacións non gobernamentais para o desenvolvemento e por outros axentes do sector unha nova norma máis acaída cos tempos e cos progresos advertidos no eido internacional.

23. Por último, a habilitación normativa e a previsión da entrada en vigor da lei aparecen recollidas en cadansúa disposición derradeira, para garantir a pacífica transición e o mantemento da seguridade xurídica neste eido, consubstancial a un Estado constitucional e de Dereito pertencente á UE.

24. Coa esta Lei reguladora da acción exterior e cooperación para o desenvolvemento de Galicia, a nosa Comunidade Autónoma dá un paso de xigante na progresión do seu Ordenamento e demostra que se pode ser ambicioso en moitas áreas de interese para o país sen por iso petar co marco constitucional e coa lealdade institucional que lle é inherente.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Autonomía de Galicia e co artigo 24 da Lei 1/1983, do 22 de febreiro, de normas reguladoras da Xunta e da súa Presidencia, promulgo en nome de El-Rei a Lei reguladora da acción exterior e cooperación para o desenvolvemento de Galicia.

TÍTULO PRELIMINAR

Artigo 1. *Obxecto*

1. A presente lei ten por obxecto a regulación da acción exterior da Comunidade Autónoma de Galicia fóra do territorio nacional español, así como facilitar a acción exterior das restantes entidades públicas con sede en Galicia, xunto coa mellor coordinación e cooperación entre todas as administracións públicas galegas, e a colaboración destas cos axentes e actores privados galegos con presenza, proxección ou intereses no exterior.

2. Asemade, é obxecto desta lei establecer e regular o réxime xurídico ao cal hase de axustar a actividade da Administración xeral e do sector público autonómico de Galicia en materia de cooperación para o desenvolvemento humano sustentable e solidariedade internacional.

3. A acción exterior prevista nesta lei desenvolverase sempre con lealdade ao bloque da constitucionalidade española, ao noso Estatuto de Autonomía e aos tratados e restantes instrumentos internacionais subscritos por España e, nomeadamente, a aqueles inseridos no Ordenamento da Unión Europea.

Artigo 2. *Definicións*

Aos efectos desta lei enténdese por:

1. Exterior: Espazo de soberanía que excede o marco territorial da exercida polo Reino de España, de conformidade co dereito internacional.

2. Acción exterior: Conxunto sistémico e integrado das actuacións das administracións públicas galegas, tanto autonómica como locais, institucionais e corporativas, e dos organismos, entidades, sociedades e institucións públicas delas dependentes, levadas a cabo no exterior, no exercicio das súas respectivas competencias, desenvolvidas de acordo con esta Lei e a planificación estratéxica da Xunta de Galicia na materia.

3. Entidades públicas con sede en Galicia: Institucións, corporacións locais, administracións públicas, entidades ou organismos de dereito público con personalidade xurídica propia dependentes ou vinculados a aquelas con sede oficial ou domicilio social en Galicia.

4. Axentes privados galegos: Persoas físicas ou xurídicas domiciliadas en Galicia, que dispoñan de vontade e capacidade de seu para desenvolver actividades

económicas, sociais, culturais, educativas ou doutra natureza fóra do territorio nacional español e que poidan contribuír á proxección de Galicia no exterior de acordo coa Estratexia galega de acción exterior (Egaex).

5. Lealdade constitucional no exterior: Respecto aos procedementos constitucionalmente previstos para acadar calquera fins políticos na proxección exterior das competencias xurídicas e intereses lexítimos de Galicia, coherente coa Estratexia española de acción exterior e coas competencias en materia de relacións internacionais correspondentes ao Goberno da Nación.

6. Acordo internacional administrativo: Acordo de carácter internacional non constitutivo de tratado que é celebrado por órganos, organismos ou entes dun suxeito de dereito internacional competentes por razón da materia, cuxa celebración está prevista no tratado que executa ou concreta e cuxo contido habitual é de natureza técnica, calquera que sexa a súa denominación, e que se rexe polo dereito internacional. Non constitúe acordo internacional administrativo o celebrado por eses mesmos órganos, organismos ou entes cando se rexe por un ordenamento xurídico interno.

7. Acordo internacional non normativo: Acordo de carácter internacional non constitutivo de tratado nin de acordo internacional administrativo celebrado pola Xunta de Galicia, en tanto que executivo da Comunidade Autónoma galega, ou as entidades locais galegas, as universidades públicas galegas e calquera outro suxeito de dereito público radicado en Galicia con competencia para iso, como poden ser as cámaras de comercio ou os colexios profesionais galegos, que conteña declaracións de intencións ou estableza compromisos de actuación de índole política, técnica ou loxística, e non constitúa fonte de obrigas internacionais nin se rexa polo dereito internacional.

8. Memorando de entendemento: Forma escrita que adoptará todo acordo internacional non normativo subscrito por unha Administración pública galega, sexa a autonómica ou calquera local, as universidades públicas galegas ou outros suxeitos de dereito público radicados en Galicia con competencia para iso, onde se detallará a natureza, identidade, nacionalidade, competencia e lexitimación de todas as administracións ou entidades subscritoras, a súa idónea representación, no cal se salientarán os diarios ou documentos oficiais onde conste esta, a exposición das razóns e obxectivos do acordo e o detalle dos apartados que precisen os puntos concretos do concerto de vontades alcanzado, especificando, ademais, a súa proxección temporal, o medio de aclarar dúbidas interpretativas ou encher as súas lagoas, a determinación dos custos inducidos e o seu financiamento, os idiomas empregados nas distintas versións lingüísticas, detallando se hai ou non unha versión auténtica que prevaleza e concluindo coa sinatura das persoas

representantes no lugar e data convidados, plasmada en, polo menos, tantas copias como persoas representadas houber e versións lingüísticas se acordaren.

9. Galeguidade: Dereito das comunidades galegas asentadas fóra de Galicia a colaborar e a compartir a vida social e cultural do pobo galego. Por extensión, o dereito dos galegos emigrados e do resto de cidadáns galegos residentes fóra de Galicia a compartir a vida social e cultural do pobo galego.

10. Lusofonía: Conxunto de Estados e comunidades de lingua portuguesa encadrados na Comunidade dos Países de Língua Portuguesa (CPLP).

11. Agrupamento sen personalidade xurídica: Comunidades de bens ou calquera outro tipo de unidade económica ou patrimonio separado que, aínda carecendo de personalidade xurídica, poidan cooperar en proxectos da acción exterior galega.

12. Rede sen personalidade xurídica: Conxunto de persoas físicas ou xurídicas, tanto públicas coma privadas, for cal fose a súa nacionalidade ou lugar de residencia ou sede, que acrediten dende o exterior un especial e acreditado afecto por Galicia.

13. Irmandamento local: Acordo estable de cooperación entre calquera corporación local galega con outra análoga pertencente a un Estado distinto de España e formalizado nun memorando de entendemento.

14. GNP, AECT: Persoa xurídica creada, de conformidade co Regulamento (CE) n.º 1082/2006 do Parlamento Europeo e do Consello, do 5 de xullo de 2006, sobre a Agrupación europea de cooperación territorial (AECT), entre a República Portuguesa a través da súa Comissão de Coordenação e Desenvolvimento Regional do Norte de Portugal (CCDR-N) e a Xunta de Galicia, como instrumento europeo de cooperación transfronteiriza, transnacional e interrexional para axudar a poñer en marcha proxectos de interese común.

Artigo 3. *Principios reitores*

No desenvolvemento e execución desta Lei observaranse os seguintes principios reitores:

1. Lealdade constitucional e estrito acatamento do bloque da constitucionalidade española, incluído o Estatuto de Autonomía galego, así como ao Dereito da Unión Europea que sexa concorrente.

2. Máxima coordinación coas autoridades estatais españolas constitucionalmente reitoras da política exterior e das relacións internacionais, e dos seus axentes, autoridades e funcionarios no eido exterior.

3. Respecto aos dereitos humanos, consonte cos tratados e outros acordos internacionais subscritos por España e pola Unión Europea.
4. Defensa dos dereitos, liberdades e lexítimos intereses dos galegos no exterior, das entidades nas que se integren e das empresas galegas que promovan actividades fóra de territorio español.
5. Promoción da cultura e da lingua galegas.
6. Permanente adaptación ao cambio na escena exterior, co fin de mellorar a competitividade para coadxuvar a preservar deste xeito o benestar da sociedade galega e os servizos públicos dos que é merecente a cidadanía.
7. Contribuír a atinxir a converxencia real cos principais indicadores socioeconómicos da Unión Europea.
8. Afondar e mellorar a internacionalización da sociedade galega.

Artigo 4. *Obxectivos estratéxicos*

Na aplicación desta lei tomarase en consideración o achegamento aos seguintes obxectivos estratéxicos:

1. Aproximación ao produto interior bruto per cápita da zona euro da Unión Europea.
2. Achegamento aos estándares socioeconómicos, de cualidade de vida, demográficos e ambientais básicos da zona euro da Unión Europea.
3. Meirande diversificación dos mercados exteriores.
4. Captación de capital mercantil e industrial destinado a investimento produtivo.
5. Captación de capital humano cualificado para o máis acelerado desenvolvemento e consolidación económica de Galicia, que axude a paliar o avellentamento da nosa poboación pola caída da nosa natalidade.
6. Retorno dos emigrantes e os seus descendentes.
7. O fornecemento das relacións coa cidadanía galega residente no estranxeiro e o apoio ás entidades galegas asentadas fóra de Galicia recoñecidas ao amparo da normativa en materia de galeguidade.

Artigo 5. Representación da Comunidade Autónoma de Galicia.

1. Corresponde á Presidencia da Xunta de Galicia, como supremo representante da Comunidade Autónoma, dirixir e coordinar a acción exterior da Xunta de Galicia, e subscribir os acordos internacionais.
2. En materias da súa competencia, a representación sectorial galega poderá ser exercida polos titulares das respectivas consellerías ou pola persoa na que delegue.
3. A Consellería na que se encadre o centro directivo responsable de velar polo desenvolvemento e execución da Egaex mirará polo mantemento da boa imaxe exterior de Galicia como Comunidade Autónoma constitucionalmente recoñecida como nacionalidade histórica e indisolublemente integrada no Reino de España, adherido á Unión Europea.
4. O emprego da imaxe corporativa oficial da Xunta de Galicia no exterior precisará da autorización previa do centro directivo responsable de velar polo desenvolvemento e execución da Egaex, consonte coa Lei 5/1984, do 29 de maio, de símbolos de Galicia previo informe vinculante do centro directivo responsable da relación cos medios.
5. A acción exterior galega considerará como guía a transcendencia estratéxica alén do espazo dunha soa lexislatura e a busca do meirande apoio parlamentario e social plasmados na Egaex.
6. A unidade de acción no exterior incluírá o aliñamento coa estratexia española de acción exterior e coa dirección da política internacional española.

TÍTULO I

Suxeitos da acción exterior galega

CAPÍTULO I

Suxeitos públicos autonómicos

Artigo 6. Suxeitos públicos cara ó exterior

Son suxeitos públicos da acción exterior galega o Parlamento de Galicia, a Xunta de Galicia, o Consello da Cultura Galega, as entidades locais galegas, consonte coa súa normativa propia, as universidades públicas galegas, a administración

corporativa galega e nomeadamente as cámaras de comercio, industria e navegación, así como os colexios profesionais, e os entes instrumentais dotados de personalidade xurídica propia, dependentes de calquera dos suxeitos antes citados, calquera que for a súa natureza ou tipoloxía xurídica.

Artigo 7. Outros suxeitos públicos cara ó exterior

1. A Real Academia Galega, en tanto que beneficiaria de financiación autonómica.
2. A Agrupación Europea de Cooperación Territorial “*Galicia-Norte de Portugal*” (GNP, AECT), con acatamento prevalente do seu Regulamento matriz da UE, do seu acordo constitutivo e cos seus propios Estatutos, sempre coa concordancia das autoridades portuguesas.
3. Outras entidades ou empresas públicas distintas das enumeradas no artigo precedente desta Lei pero inseridas nas definicións auténticas reproducidas no artigo 2.1.1),2),3) e 4) da Directiva 2014/24/UE do Parlamento Europeo e do Consello do 26 de febreiro de 2014 sobre contratación pública e pola que se derroga a Directiva 2004/18/CE, ou nos artigos 6 ou 7 da Directiva 2014/23/UE do Parlamento Europeo e do Consello do 26 de febreiro de 2014 relativa á adxudicación de contratos de concesión, ou nos artigos 3 ou 4 da Directiva 2014/25/UE do Parlamento Europeo e do Consello do 26 de febreiro de 2014 relativa á contratación por entidades que operan nos sectores da auga, a enerxía, os transportes e os servizos postais e pola que se derroga la Directiva 2004/17/CE, e coas restantes normas da UE que as modifiquen, suplan ou complementen á hora de definir os poderes públicos.

CAPÍTULO II

Suxeitos privados

Artigo 8. Suxeitos privados concorrentes na acción exterior galega

1. Aos efectos desta Lei, terán esta consideración os actores galegos de dereito privado que colaboren voluntariamente coa Xunta de Galicia na execución da planificación estratéxica da acción exterior galega, como é o caso das organizacións empresariais, sindicais e profesionais, das organizacións non gobernamentais de cooperación para o desenvolvemento, das asociacións e agrupamentos de exportadores ou das entidades que aglutinen ás comunidades galegas ou ás sociedades e asociacións de estudos internacionais con sede en Galicia.

2. Do mesmo xeito terán a consideración de suxeitos privados concorrentes na acción exterior galega as redes e agrupamentos de persoas físicas ou xurídicas, tanto públicas coma privadas, for cal fose a súa nacionalidade ou lugar de residencia ou sede, que acrediten dende o exterior un especial e acreditado afecto por Galicia, podendo mesmo seren beneficiarias de axudas e subvencións no exterior como tales agrupamentos de persoas físicas ou xurídicas, públicas ou privadas, as comunidades de bens ou calquera outro tipo de unidade económica ou patrimonio separado que, aínda carecendo de personalidade xurídica, poidan cooperar en proxectos da acción exterior galega, consonte co artigo 8.3 da Lei 9/2007, do 13 de xuño, de subvencións de Galicia ou precepto que o modifique, supla ou complemente.

TÍTULO II

Programación da acción exterior galega

CAPÍTULO I

Estratexia galega de acción exterior (Egaex)

Artigo 9. Inicio da programación

1. A acción exterior galega programará periodicamente por lustros as súas iniciativas nun documento estratéxico que prelace os obxectivos a longo prazo, tanto materiais coma xeográficos, e ordene e rexa as diversas iniciativas sectoriais na materia, dotándoas de congruencia e coherencia, aproveitando as súas complementariedades e velando pola eficiencia no uso dos recursos públicos, co obxecto de maximizar os retornos socioeconómicos, demográficos e culturais para a Comunidade Autónoma.

2. O centro directivo da Xunta de Galicia en que se encadren as competencias fundamentais de acción exterior elaborará un borrador de estratexia, atendendo aos previos documentos de planificación da Xunta de Galicia que tivesen unha proxección exterior e á vixente estratexia española, así como considerando as achegas das consellerías, entidades, organismos, institucións e expertos con intereses e experiencia na materia.

Artigo 10. *Tramitación da Estratexia galega de acción exterior*

1. O borrador de estratexia galega de acción exterior (Egaex) será sometido a información pública no portal de transparencia da Xunta de Galicia, e estará aberto á realización de suxestións pola cidadanía galega.
2. Logo de avaliadas as achegas a través do portal de transparencia, o borrador da Egaex remitirase ao órgano superior da Administración xeral da Xunta de Galicia competente en materia de igualdade para a emisión dun informe no que se avalíe o impacto por razón de xénero das medidas e accións previstas e, posteriormente, será sometido á avaliación e informe do Consello galego de Acción Exterior (Caex). A composición e funcionamento do Caex serán desenvolvidos mediante Decreto da Xunta de Galicia.
3. Logo do informe do Caex, o centro directivo da Xunta de Galicia en que se encadren as competencias fundamentais de acción exterior e responsable da tramitación e ulterior execución da Egaex reformulará o borrador da Egaex, pasando á condición de anteproxecto.
4. O anteproxecto da Egaex será visto polo Consello da Xunta, con carácter previo á súa remisión ao Ministerio competente en asuntos exteriores co fin de que efectúe as recomendacións ou suxira as melloras de coordinación que considere pertinentes.
5. O titular da consellería da Xunta de Galicia na que se encadren as competencias fundamentais de acción exterior proporá ao Consello da Xunta o anteproxecto da Egaex xunto coas recomendacións ou suxestións de melloras de coordinación efectuadas polo Ministerio competente en asuntos exteriores para avaliar, no seu caso, as modificacións a introducir e a continuación da súa tramitación.

Artigo 11. *Información ao Parlamento de Galicia*

1. O titular da consellería na que se encadren as competencias fundamentais de acción exterior someterá o proxecto da Egaex a informe do Parlamento de Galicia consonte co artigo 142 do seu Regulamento ou equivalente, que verse sobre a consideración dos programas e plans elaborados polo executivo galego.
2. Para o seu pronunciamento, a Mesa do Parlamento remitirá o proxecto da Egaex á súa Comisión competente, votándose ao cabo unha proposta de resolución en conxunto para o seu debate en bloque no Pleno da Cámara.
3. Á vista do informe do Parlamento de Galicia, o titular da consellería na que se encadren as competencias fundamentais de acción exterior culminará o proxecto

definitivo da Egaex, que será remitido ao Consello da Xunta para, de ser o caso, a súa aprobación.

Artigo 12. Aprobación da Egaex

Á vista do conxunto das alegacións, suxestión e informes, o Consello da Xunta aprobará ou emendará ao seu criterio como plan a estratexia galega de acción exterior (Egaex), que se publicará no Portal de transparencia e Goberno aberto da Xunta de Galicia. Con posterioridade daralle traslado oficial ao Ministerio competente en asuntos exteriores para o seu coñecemento.

Artigo 13. Execución da Egaex

1. O centro directivo da Xunta de Galicia en que se encadren as competencias fundamentais de acción exterior e que tivera elaborado o borrador inicial da Egaex será o responsable de velar polo seu desenvolvemento e execución. Con este fin poderá dar conta do estado de desenvolvemento e de execución da Egaex ao seu superior xerárquico, así como das desviacións que tivese apreciado. En caso de desviacións graves, o pertinente informe será elevado ao Consello da Xunta para a súa deliberación e para dispor as medidas correctoras oportunas.

2. Anualmente o centro directivo responsable de velar polo desenvolvemento e execución da Egaex elaborará un informe xeral, que será elevado polo titular da Consellería na que estiver inserido ao Consello da Xunta.

CAPÍTULO II

Revisión da Egaex

Artigo 14. Revisión da Estratexia galega de acción exterior

1. Por proposta motivada dun terzo dos membros do Caex, e tras a súa deliberación e votación, a Xunta de Galicia deberá avaliar a necesidade de iniciar a revisión da estratexia vixente para adaptala a un novo contexto, logo do informe do centro directivo en que se encadren as competencias fundamentais de acción exterior.

2. De forma ordinaria, con polo menos seis meses de antelación a que expire o prazo de vixencia previsto da estratexia en curso, o centro directivo en que se

encadren as competencias fundamentais de acción exterior iniciará os trámites de revisión desta.

3. En tanto non sexa aprobada unha nova estratexia, o Consello da Xunta de Galicia poderá prorrogar a que estiver vixente, por períodos que oscilarán entre seis meses e un ano, ata que se poida aprobar con todos os trámites indispensables unha nova estratexia. Se o executivo autonómico estiver en funcións, entenderase prorrogada tacitamente a estratexia en vigor por un período de seis meses, dentro do cal o novo executivo poderá prorrogala, pola súa vez, ata que se formalice unha nova estratexia galega de acción exterior.

CAPÍTULO III

Estratexia española de acción exterior

Artigo 15. Participación de Galicia na Estratexia española de acción exterior

1. A Xunta de Galicia, a través da Consellería que teña atribuída as funcións en materia de acción exterior, manterá unha comunicación fluída e directa co Ministerio competente en asuntos exteriores, co fin de que este inclúa na estratexia española de acción exterior as prioridades que interesen ou preocupen á sociedade galega, facendo especial fincapé na promoción da lingua, cultura e imaxe de Galicia, na defensa dos dereitos e expectativas da diáspora galega nos Estados en que estiver asentada, na promoción da empresa e a economía galegas no exterior e no estreitamento do vínculo con Portugal e coa comunidade lusófona de nacións.

2. O Consello da Xunta de Galicia, por proposta da consellería que concentre as competencias e funcións primordiais en materia de acción exterior, aprobará mediante acordo o documento que recolla as achegas galegas á estratexia española de acción exterior, logo de consulta ao Caex e ás restantes consellerías.

TÍTULO III

Aplicación da Egaex e coordinación da acción exterior galega

CAPÍTULO I

Aplicación da Egaex

Artigo 16. Aplicación da Egaex

1. A aplicación ordinaria da Egaex será responsabilidade da autoridade superior de cada institución, consellería, departamento, entidade ou organismo públicos concernidos.
2. A persoa titular da consellería responsable de velar polo desenvolvemento e execución da Egaex supervisará a súa correcta aplicación. A este fin poderá requirir das autoridades públicas atinxidas pola presente lei cantas informacións, datos e informes estime axeitados, e canda menos a cada consellería un informe anual cun mes de antelación ao exame polo Consello da Xunta do informe referido no artigo 12 desta lei.

Artigo 17. Desenvolvemento sectorial da Egaex

As institucións, consellerías, departamentos, entidades ou organismos que precisen dunha singular proxección e presenza no exterior poderán elaborar un programa anual específico de acción exterior, sempre dentro do marco da Egaex, dando conta á consellería responsable de velar polo desenvolvemento e execución desta para garantir a súa compatibilidade.

Artigo 18. Programas de acción exterior doutras administracións públicas galegas e do sector público institucional

Os concellos, deputacións, universidades públicas e corporacións de dereito público radicadas en Galicia poderán elaborar os seus propios programas de acción exterior coa duración ou periodicidade que estimen axeitados, remitíndoos á Xunta de Galicia para garantir a súa compatibilidade coa Egaex.

CAPÍTULO II

Viaxes oficiais ao exterior

Artigo 19. Transparencia das viaxes oficiais ao exterior

1. As propostas sobre viaxes, visitas, intercambios e actuacións con proxección exterior da persoa titular da Presidencia da Xunta de Galicia e dos membros do Consello da Xunta de Galicia, serán remitidas ao centro directivo con competencias en materia de acción exterior, que as trasladará ao Ministerio de Asuntos Exteriores e Cooperación, en cumprimento das obrigas de información dos suxeitos da Acción Exterior do Estado. Esta obriga non será de aplicación cando se trate de actuacións no ámbito da Unión Europea e de viaxes ou visitas ás súas institucións.

2. As propostas de viaxes, intercambios e actuacións con proxección exterior doutros órganos superiores e dos órganos directivos da Administración xeral, así como dos presidentes e directores xerais da entidades instrumentais do sector público autonómico, serán remitidas ao centro directivo con competencias en materia de acción exterior, que deberá examinar a súa compatibilidade coa Estratexia Galega de Acción Exterior. Cando as propostas de actuación non estean recollidas na Estratexia Galega de Acción Exterior, deberán xustificarse as circunstancias que motivan estas actuacións.

3. O anterior non será de aplicación cando se trate de viaxes que se desenvolvan integramente na Rexión Norte de Portugal como constituínte da Eurorrexión Galicia-Norte de Portugal, ou de viaxes que teñan por único propósito manter reunións de traballo nas sés das Institucións e órganos da Unión Europea.

Tampouco será de aplicación o previsto no apartado 2 cando se trate de viaxes, intercambios e actuacións realizadas no marco da normativa autonómica en materia de galeguidade.

4. Regulamentariamente estableceranse a documentación e prazos para a comunicación ao centro directivo con competencias en materia de acción exterior das propostas ás que se refiren os parágrafos anteriores, así como da documentación ao remate destas actuacións.

5. O centro directivo con competencias en materia de acción exterior informará anualmente ao Parlamento das viaxes oficiais ao exterior xunto co informe xeral precisado no artigo 13 da presente Lei.

CAPÍTULO III

Recepción de autoridades oficiais procedentes do exterior

Artigo 20. Procedemento de recepción

1. Con carácter previo ás datas nas que estea prevista a recepción de visitas de autoridades públicas do exterior por parte da persoa titular da Presidencia da Xunta de Galicia e dos membros do Consello da Xunta de Galicia, procederá a súa comunicación ao centro directivo con competencias en materia de acción exterior, que as trasladará ao Ministerio de Asuntos Exteriores e Cooperación, en cumprimento das obrigas de información dos suxeitos da Acción Exterior do Estado. Esta obriga non será de aplicación cando se trate de actuacións no ámbito da Unión Europea e de viaxes ou visitas dos representantes das súas institucións.
2. Con carácter previo ás datas nas que estea prevista a recepción de visitas de autoridades públicas do exterior por parte doutros órganos superiores e dos órganos directivos da Administración xeral, así como dos presidentes e directores xerais da entidades instrumentais do sector público autonómico, procederá a súa comunicación ao centro directivo con competencias en materia de acción exterior, que deberá examinar a súa compatibilidade coa Estratexia Galega de Acción Exterior. Cando as propostas de actuación non estean recollidas na Estratexia Galega de Acción Exterior, deberán xustificarse as circunstancias que motivan estas actuacións.
3. Corresponde ao centro directivo con competencias en materia de acción exterior informar sobre a adecuación da recepción de visitas institucionais de autoridades do exterior á Estratexia Galega de Acción Exterior e aos intereses galegos no exterior, así como emitir recomendacións, se é o caso, en relación co traslado desta información a outras autoridades da Administración xeral e do sector público autonómico, ou a outras autoridades públicas galegas.
4. O previsto nos apartados 2 e 3 non será de aplicación cando se trate de visitas de autoridades ou representantes da Eurorrexión Galicia-Norte de Portugal, ou de visitas de autoridades ou representantes das Institucións e órganos da Unión Europea, nin cando se trate de visitas recibidas no marco da normativa autonómica en materia de galeguidade.
5. O centro directivo con competencias en materia de acción exterior informará anualmente ao Parlamento de Galicia da relación de visitas oficiais de autoridades públicas do exterior xunto co informe xeral precisado no artigo 13 da presente Lei.

TÍTULO IV

Eurorrexión Galicia-Norte de Portugal e Lusofonía

Artigo 21. Ámbito da Eurorrexión

Para os efectos desta Lei, a Eurorrexión Galicia-Norte de Portugal é a constituída pola suma do territorio e augas interiores da Comunidade Autónoma de Galicia e máis da Rexión Norte de Portugal.

Artigo 22. Comunidade de Traballo Galicia-Norte de Portugal

1. A Eurorrexión Galicia-Norte de Portugal organízase desde a vertente galega e en sintonía coas autoridades portuguesas a través da Comunidade de Traballo Galicia-Norte de Portugal, constituída paritariamente por representantes da Xunta de Galicia e da Comisión de Coordinación da Rexión Norte de Portugal –Comissão de Coordenação e Desenvolvimento Regional do Norte (CCDR-N)– e que adopta as súas decisións por consenso.

2. A Comunidade de Traballo Galicia-Norte de Portugal tamén pode integrar no seu seo outras institucións que traballen a favor da cooperación transfronteiriza na Eurorrexión, nos termos que acorde a propia Comunidade de Traballo.

3. A Comunidade de Traballo Galicia-Norte de Portugal auto-organízase con plena autonomía, respectando en todo caso o que determinen os ordenamentos da Unión Europea, portugués, español e galego. A súa presidencia e vicepresidencia son rotatorias por períodos de dous anos, e son exercidas respectiva e alternamente pola persoa titular da Presidencia da CCDR-N e pola persoa titular da Presidencia da Xunta de Galicia.

4. A Comunidade de Traballo Galicia-Norte de Portugal executa as súas tarefas a través da Presidencia bianual rotatoria que corresponda, que exerce, ademais, a súa representación.

5. Os diferentes regulamentos de réxime interior da Comunidade de Traballo determinarán a composición, atribucións e funcionamento dos diversos órganos desta Comunidade.

6. O Plenario da Comunidade de Traballo Galicia-Norte de Portugal é o seu órgano supremo e agrupa aos representantes sectoriais de ambas as dúas administracións

e ás administracións locais, ós grupos de traballo específicos que se determinen, ás comunidades territoriais de cooperación que acorden os municipios conveciños de Galicia e da rexión Norte de Portugal, e ós órganos asesores especializados que a asistan.

7. A Comunidade de Traballo Galicia-Norte de Portugal determina as orientacións xerais e as pautas políticas da cooperación territorial e transfronteiriza no ámbito da Eurorrexión.

8. Corresponde á Comunidade de Traballo coordinar e propoñer ao Cumio Bilateral Hispano-Portugués as distintas prioridades que, en materia de cooperación transfronteiriza con Portugal, se queiran elevar a estes organismos para que sexan tidas en conta nas súas respectivas convocatorias. Para tal fin e co obxectivo de unificar e de consensuar as diferentes propostas das consellerías e departamentos autonómicos, a Comunidade de Traballo solicitará os informes, plans e proxectos que se deban ter en conta para que sexan abordados polos gobernos de España e Portugal.

9. A coordinación entre a Comunidade de Traballo Galicia-Norte de Portugal e as administracións e autoridades públicas galegas corresponderá ao centro directivo responsable de velar polo desenvolvemento e execución da Egaex.

Artigo 23. A AECT da Eurorrexión

1. A Comunidade de Traballo Galicia-Norte de Portugal posúe ao seu servizo como instrumento preferente para executar as actuacións convidadas para a cooperación luso-galaica de base territorial e transfronteiriza a entidade Galicia-Norte de Portugal, Agrupación europea de cooperación territorial (en diante GNP-AECT), institución creada ao abeiro do dereito da Unión Europea, cuxa constitución ficou acreditada no Diario Oficial de la Unión Europea, serie S, do 3 de xaneiro de 2009, baixo a referencia 2009/S 1-001310.

2. GNP-AECT caracterízase como unha persoa xurídico-pública constituída pola República Portuguesa, a través da súa Comisión de Coordinación da Rexión Norte de Portugal -Comissão de Coordenação e Desenvolvimento Regional do Norte (CCDR-N)-, e pola Xunta de Galicia, ao abeiro do Regulamento (CE) nº 1082/2006 do Parlamento Europeo e do Consello, do 5 de xullo de 2006, sobre a Agrupación europea de cooperación territorial (AECT), e está, por conseguinte, á marxe do sector público autonómico.

3. GNP-AECT réxese polo sistema de fontes detallado no artigo 2 do Regulamento (CE) nº 1082/2006 sobre a Agrupación europea de cooperación territorial (AECT),

modificado polo Regulamento (UE) nº 1302/2013 do Parlamento Europeo e do Consello, do 17 de decembro de 2013, no que se refire á clarificación, á simplificación e á mellora da creación e o funcionamento de tales agrupacións.

4. O sector público autonómico, definido pola Lei 16/2010, do 17 de decembro, poderá destinar persoal propio á sede, instalacións ou centros de enlace de GNP-AECT, ou da CCDR-N, se mediera un acordo, convenio ou memorando de entendemento entre as autoridades portuguesas ou da GNP-AECT e as galegas, ou ás dependencias do centro directivo da propia Xunta que coordina a cooperación territorial e transfronteiriza con Portugal, sempre que o devandito persoal o solicite con carácter voluntario, ben en comisión de servizos ou, se for o caso, en servizos especiais como experto destacado. Nos casos de destino de persoal autonómico en GNP-AECT ou na CCDR-N, o respectivo persoal da Xunta de Galicia pasará ben á situación de servizos especiais, se for retribuído con cargo ao orzamento daquelas entidades, ou ben permanecerá en activo coa pertinente licenza que permita o seu desempeño ordinario naquelas entidades como experto destacado ante elas.

5. O sector público autonómico definido pola Lei 16/2010, do 17 de decembro, facilitará un trato análogo ao persoal da CCDR-N que sexa destacado para desempeñar as súas tarefas ordinarias na sede, instalacións ou centros de enlace de GNP-AECT ou da propia Xunta de Galicia.

6. GNP-AECT colaborará cos departamentos e entidades autonómicas para prestar asistencia e apoio en materia de cooperación transfronteiriza. Estes poderán encargar a GNP-AECT a xestión de determinados programas de actuación sectorial relativos á cooperación transfronteiriza, traspasándolle os fondos e medios necesarios. O devandito encargo deberá ser aceptado polo Consello de GNP-AECT.

Artigo 24. Planificación estratéxica e programación de actuacións públicas de relevancia para a Eurorrexión

Na elaboración de plans e programas autonómicos que poidan ter transcendencia, repercusión ou interese para o conxunto da área da Eurorrexión, os departamentos autonómicos impulsores dos devanditos plans e programas poderán dar audiencia específica ás autoridades portuguesas competentes, co fin de reducir conxuntamente os custos da súa execución, ampliar o número de persoas beneficiarias cun menor custo por persoa beneficiaria grazas ás economías de escala que concorran, ou co propósito de incrementar os resultados ou retornos cun inferior custo unitario.

Artigo 25. Cooperación territorial e transfronteiriza galaico-portuguesa de base local

1. Os municipios galegos poderán cooperar con outros municipios portugueses veciños chegando a formalizar mesmo «eurociudades», baixo a cobertura xurídica dunha agrupación europea de cooperación territorial ou de calquera outra forma xurídica, con ou sen personalidade, recoñecida polos respectivos ordenamentos portugués e galaico-español. Na hipótese de constituírse baixo a fórmula de AECT, a parte galega propiciará a máis estreita cooperación e coordinación con GNP-AECT.
2. Para os efectos desta Lei, as eurociudades estarán conformadas por dous ou máis concellos galegos e cámaras municipais portuguesas, con situación de contigüidade entre si ao longo do tramo galego da fronteira hispano-portuguesa.
3. As eurociudades teñen como principal obxectivo a promoción da converxencia institucional, económica, social, cultural e ambiental entre os concellos galegos e as cámaras municipais portuguesas que as compoñen, impulsando a utilización de servizos comúns como instrumento dinamizador da convivencia entre a poboación de ambos os dous territorios.
4. A creación dunha eurocidade farase por medio dun acordo en forma de memorando de entendemento entre os concellos galegos e as cámaras municipais portuguesas participantes, en que se detallen, polo menos, os obxectivos que se pretenden alcanzar e os campos en que van colaborar. Este acordo deberá ser aprobado previamente por cada respectivo pleno municipal. A formalización da constitución da eurocidade debe despois ser ratificada pola Comunidade de Traballo Galicia-Norte de Portugal, e tramitase dende a parte galega consonte co Título VI desta Lei.
5. A constitución de novas AECTs de base local ou provincial precisará en calquera caso para as autoridades locais galegas dun informe previo do centro directivo responsable de velar polo desenvolvemento e execución da Egaex que avalíe a súa incorporación a unha AECT luso-galaica de base local ou provincial, que cadrará co previsto no Real Decreto 23/2015, de 23 de xaneiro, polo que se adoptan as medidas necesarias para a aplicación efectiva do Regulamento (CE) nº 1082/2006 do Parlamento Europeo e do Consello, de 5 de xullo de 2006, sobre a Agrupación Europea de Cooperación Territorial (AECT), modificado polo Regulamento (UE) nº 1302/2013 do Parlamento Europeo e do Consello, de 17 de decembro de 2013, no que se refire á clarificación, á simplificación e á mellora da creación e o funcionamento de tales agrupacións.

Artigo 26. *Cooperación galaico-portuguesa no ámbito da Lusofonía*

1. De conformidade co establecido pola Lei 1/2014, do 24 de marzo, para o aproveitamento da lingua portuguesa e os vínculos coa Lusofonía, a Xunta de Galicia poderá poñer en marcha un programa específico de fomento de intercambios e estadias temporais de persoal empregado público galego e portugués, en especial naquelas áreas en que se considere máis urxente o establecemento dun maior ou máis intenso nivel de cooperación, coordinación ou, mesmo, de integración de servizos públicos.
2. GNP-AECT instrumentará a cooperación galaico-portuguesa no ámbito da Lusofonía a través de programas específicos, promovendo intercambios culturais, universitarios e educativos entre actores e axentes destes ámbitos portugueses, doutros países lusófonos e galegos.

TÍTULO V

Galicia en Europa

CAPÍTULO I

Participación de Galicia nos asuntos da Unión Europea

Sección 1ª. Participación na formación da vontade do Estado diante da UE

Artigo 27. *Conferencia para Asuntos Relacionados coa Unión Europea (CARUE)*

1. A Conferencia para Asuntos Relacionados coa Unión Europea (en diante CARUE), fundamentada na *Lei 2/1997, do 13 de marzo, pola que se regula a Conferencia para Asuntos Relacionados coa Unión Europea*, é o órgano principal de cooperación entre a Administración xeral do Estado e as comunidades autónomas para coordinar a participación destas nos asuntos da Unión. Na devandita conferencia, a Xunta de Galicia estará representada pola persoa titular da consellería competente en materia de relacións coa UE e acción exterior.
2. A persoa á fronte do centro directivo en que se encadren as competencias fundamentais de relacións coa UE e acción exterior da Xunta de Galicia será a representante natural da Xunta de Galicia na Comisión de Coordinadores da CARUE, preparando os traballos e executando as tarefas que aquela lle confíe, e

cooperando e coordinándose coas persoas representantes da Administración xeral do Estado e das administracións das comunidades autónomas que nela participen.

3. Sen prexuízo das competencias específicas atribuídas ás distintas conferencias sectoriais de cooperación e coordinación entre a Administración xeral do Estado e as comunidades autónomas, a Xunta de Galicia abordará no ámbito de CARUE todas aquelas cuestións prácticas relacionadas co exercicio da participación autonómica en asuntos da Unión, especialmente no referido ao Consello da Unión Europea, aos seus grupos de traballo, e aos comités da Comisión Europea. Así mesmo, a CARUE será o foro onde Galicia debaterá e negociará cando proceda a renovación de postos de conselleiros/as autonómicos/as dentro da Representación Permanente de España ante a Unión Europea (Reper).

Artigo 28. Do tratamento dos asuntos europeos nas conferencias sectoriais

1. A persoa titular da consellería da Xunta de Galicia que exerza a representación do resto de comunidades autónomas en calquera das formacións do Consello da Unión Europea, solicitará a inclusión dun punto singular sobre esta cuestión na orde do día nas reunións da conferencia sectorial correspondente, onde dea conta do alcance da participación, dos temas que se van tratar ou de calquera aspecto práctico que poida xurdir no exercicio da devandita representación.

2. Así mesmo, ao finalizar o período de representación, a devandita consellería presentará na súa respectiva conferencia sectorial un informe final cun balance dos resultados obtidos no exercicio da devandita representación e facilitará a transición da representación autonómica coa comunidade autónoma á que corresponda asumir a vez desa representación no Consello da Unión, trasladando copia de todo iso ao centro directivo en que se encadren as competencias fundamentais de relacións coa UE e acción exterior da Xunta de Galicia.

Artigo 29. Grupo de Traballo de Asuntos Europeos e Acción Exterior

A persoa titular da consellería que concentre as competencias e funcións primordiais en—materia de relacións coa UE e acción exterior designará as persoas representantes da Xunta de Galicia no Grupo de Traballo de Asuntos Europeos e Acción Exterior, encadrado na Comisión Bilateral de Cooperación entre a Administración xeral do Estado e da Comunidade Autónoma de Galicia. Estas persoas representantes reportarán as súas actividades a través do centro directivo responsable de velar polo desenvolvemento e execución da Egaex, coa periodicidade e exhaustividade que se determine.

Sección 2ª. Participación en institucións e órganos da UE

Artigo 30. Ámbito competencial

1. Corresponde ao centro directivo en que se encadren as competencias fundamentais de relacións coa UE e acción exterior o impulso, tramitación e seguimento das actuacións que desenvolvan os diferentes órganos superiores e de dirección da Administración xeral da Comunidade Autónoma de Galicia no ámbito da Unión Europea, tanto no que se refire á presenza directa nos seus órganos e institucións como á participación nos asuntos europeos, sen prexuízo das competencias sectoriais que a cada departamento correspondan.

2. Para o efectivo seguimento das actuacións da Xunta de Galicia na Unión Europea, no que respecta a este capítulo, deberá designarse, no prazo de dous meses desde a publicación desta Lei, unha persoa responsable nos ámbitos da Presidencia e de cada consellería, preferentemente con rango de vicesecretaría ou subdirección, a poder ser con coñecemento doutros idiomas europeos, para exercer de punto de contacto co citado centro directivo, respecto aos asuntos da Unión aquí regulados.

Artigo 31. Consello da Unión Europea

1. A Xunta de Galicia poderá participar nas formacións sectoriais do Consello da Unión Europea, en diante Consello da UE, en que sexa posible a participación das comunidades autónomas segundo os acordos adoptados entre a Administración xeral do Estado e as administracións autonómicas. A devandita participación, exercida a través das persoas titulares das distintas consellerías, realizarase en representación de todas as comunidades autónomas, integrándose dentro da delegación española e asumindo a coordinación do proceso previo ante aquelas e a concertación coa Administración xeral do Estado.

2. En aplicación do artigo 16.2 do vixente Tratado da Unión Europea (TUE) e dos acordos de participación autonómica antes citados, enténdese que cando a persoa titular dunha consellería interveña nunha reunión de calquera formación do Consello da UE, a devandita persoa terá un rango asimilado ao ministerial.

3. A persoa titular da consellería que asista a unha reunión da formación sectorial do Consello da UE informará, inmediatamente, ao Consello da Xunta de Galicia das xestións realizadas, do resultado das negociacións e das posibles implicacións para

Galicia, trasladando copia ao centro directivo en que se encadren as competencias fundamentais de relacións coa UE e acción exterior da Xunta de Galicia.

4. Na súa intervención ante o Consello da UE, a persoa titular da consellería poderá utilizar a lingua galega logo da solicitude realizada cunha antelación mínima de sete semanas, que será formalizada ante o dito Consello polo o centro directivo en que se encadren as competencias fundamentais de relacións coa UE e acción exterior da Xunta de Galicia, canalizada, pola súa vez, a través da Administración xeral do Estado.

5. Corresponderá ao centro directivo en que se encadren as competencias fundamentais de relacións coa UE e acción exterior da Xunta de Galicia levar a cabo funcións de información, apoio, seguimento e cooperación na participación da persoa representante autonómica no Consello da UE, así como a coordinación e interlocución cos servizos da Administración xeral do Estado e da Representación Permanente de España ante a UE (Reper), no que respecta á realización dos trámites que posibiliten facer efectiva a devandita participación.

6. Para os efectos de facilitar o seguimento dos asuntos en cada exercicio de representación, a consellería competente poderá desprazar persoal técnico á oficina da Fundación Galicia Europa en Bruxelas polo tempo que dure a devandita representación. Este desprazamento estará sometido á normativa vixente en materia de función pública ou á normativa laboral, e amparándose na subscripción dun convenio de cooperación ou de calquera outro instrumento xurídico concertado previamente entre a Fundación Galicia Europa e a devandita consellería competente.

Artigo 32. Grupos de traballo do Consello da Unión Europea

1. A Xunta de Galicia promoverá a participación do seu persoal técnico naqueles grupos de traballo do Consello da UE, relacionados coas formacións sectoriais desta institución da Unión Europea, nas cales tiver dereito a participar, por si mesma ou en coordinación coas restantes comunidades autónomas.

2. A participación efectiva, en representación de todas as comunidades autónomas, levarase a cabo mediante a incorporación á delegación española de persoal técnico designado pola persoa titular da consellería a quen corresponda exercer por razón da materia a participación autonómica no Consello da UE. A devandita designación deberá ser notificada ao centro directivo responsable de velar polo desenvolvemento e execución da Egaex.

3. Corresponderá á persoa responsable técnica designada o seguimento dos asuntos, a asistencia ás reunións, a coordinación a nivel técnico coa Administración xeral do Estado e das comunidades autónomas entre si, a preparación de informes e propostas de posición común e, en xeral, cantas outras sexan necesarias para garantir a efectiva representación autonómica. Para os únicos efectos de seguimento, a devandita persoa responsable deberá informar igualmente das súas actuacións ao centro directivo en que se encadren as competencias fundamentais de relacións coa UE e acción exterior da Xunta de Galicia.

Artigo 33. Comités da Comisión Europea

1. A Xunta de Galicia promoverá a participación do seu persoal técnico naqueles comités da Comisión Europea en que tiver dereito a participar, por si ou en coordinación coas restantes comunidades autónomas, tras o preceptivo acordo coa Administración xeral do Estado.

2. Para cada un dos comités da Comisión Europea con participación autonómica, a consellería competente por razón da materia deberá designar unha persoa responsable sectorial que poida servir de interlocutora coas correspondentes persoas representantes estatais e/ou autonómicas, sendo obrigatorio informar de inmediato de calquera modificación ou cambio que se poida producir durante o tempo de vixencia do período de representación. A designación e posteriores cambios deberán notificarse ao centro directivo en que se encadren as competencias fundamentais de relacións coa UE e acción exterior da Xunta de Galicia.

3. Durante o período temporal en que corresponda á comunidade autónoma de Galicia exercer a representación autonómica, a persoa responsable sectorial no respectivo comité terá a condición de representante de todas as comunidades autónomas. Deberá asistir ás reunións do comité, levar a cabo o seguimento dos asuntos e informar ao resto das comunidades autónomas.

4. Cando nos asuntos sometidos aos devanditos comités da Comisión Europea os centros directivos se posicionen sobre estes, deberán trasladar copia do seu posicionamento ao centro directivo en que se encadren as competencias fundamentais de relacións coa UE e acción exterior da Xunta de Galicia. Ao citado centro directivo corresponderalle levar a cabo funcións de información, apoio, seguimento e coordinación da participación autonómica nos comités.

5. Ao finalizar o período de representación, a persoa responsable sectorial autonómica concertará o traspaso coa persoa responsable sectorial da comunidade autónoma a quen corresponda asumir a vez no respectivo comité, e elaborará un

informe final que deberá remitir ás demais comunidades autónomas e ao centro directivo en que se encadren as competencias fundamentais de relacións coa UE e acción exterior da Xunta de Galicia.

6. Se os departamentos da Xunta de Galicia detectasen novos comités nos que fose de interese a participación das comunidades autónomas, remitirán a proposta ao centro directivo en que se encadren as competencias fundamentais de relacións coa UE e acción exterior para a súa negociación coa Administración xeral do Estado e coas comunidades autónomas.

Artigo 34. Comité Europeo das Rexións (CER)

1. A Xunta de Galicia participa no Comité Europeo das Rexións (CER) a través dun membro titular e outro suplente, designados polo Consello da Unión Europea por proposta do órgano ao que corresponda a suprema representación da Comunidade Autónoma de Galicia, canalizada, pola súa vez, a través da Administración xeral do Estado.

2. Dentro da Xunta de Galicia, a coordinación das actividades relacionadas coa participación no Comité Europeo das Rexións corresponde ao centro directivo en que se encadren as competencias fundamentais de relacións coa UE e acción exterior da Xunta de Galicia.

3. A participación da Xunta de Galicia no Comité Europeo das Rexións concretarase, entre outros aspectos, na asistencia ás sesións plenarias, comisións e demais órganos que o integran; na realización de análises e a elaboración de ditames e presentación e/ou apoio de emendas. Para estes efectos, os proxectos de resolución ou ditame serán remitidos por medios telemáticos desde o centro directivo en que se encadren as competencias fundamentais de relacións coa UE e acción exterior da Xunta de Galicia aos departamentos autonómicos competentes por razón da materia, para a súa análise e conformidade ou desconformidade, ou para a proposta de emendas no prazo que se indique no escrito de remisión segundo o prazo que, pola súa vez, tiver outorgado o Comité Europeo das Rexións.

4. As propostas de emenda recibidas doutros membros do Comité Europeo das Rexións para solicitar o correspondente apoio galego serán remitidas polo centro directivo en que se encadren as competencias fundamentais de relacións coa UE e acción exterior da Xunta de Galicia, aos departamentos autonómicos competentes por razón da materia para a súa análise e conformidade ou desconformidade, sempre para pronunciarse no prazo que se indique no escrito de remisión segundo o prazo que, pola súa vez, tiver outorgado o Comité Europeo das Rexións.

5. Os membros titular e suplente da Xunta de Galicia poderán utilizar a lingua galega durante as sesións plenarias do Comité Europeo das Rexións, logo da solicitude realizada ante dito Comité polo centro directivo responsable en que se encadren as competencias fundamentais de relacións coa UE e acción exterior da Xunta de Galicia, canalizada, pola súa vez, a través da Administración xeral do Estado.

Artigo 35. Comité Económico e Social Europeo

A Xunta de Galicia promoverá a participación de persoas representantes galegas no Comité Económico e Social Europeo dentro da delegación española, integrada por membros que representan os distintos intereses económicos, sociais e culturais. Para este fin, difundirá entre as entidades galegas susceptibles de participar no Comité Económico e Social Europeo o coñecemento deste e as súas actividades, coa asistencia e auxilio, se for preciso, do centro directivo en que se encadren as competencias fundamentais de relacións coa UE e acción exterior da Xunta de Galicia.

Artigo 36. Tribunal de Xustiza da Unión Europea

1. Nos supostos en que o permita a normativa procesual europea, cando resulten prexudicados os dereitos ou intereses lexítimos de Galicia, a Xunta de Galicia poderá solicitar intervir nas actuacións da Administración xeral do Estado nos asuntos relacionados co Tribunal de Xustiza da Unión Europea que afecten as súas competencias, solicitando mesmo a actuación do Reino de España coa súa propia personalidade e lexitimación xurídica cualificada ante o devandito tribunal ou calquera outro tribunal da Unión en defensa de Galicia.

2. Se a Xunta de Galicia considera que unha disposición ou acto adoptado por unha institución da Unión que poida producir efectos xurídicos debe ser impugnado polo Reino de España ante o Tribunal de Xustiza da UE ou calquera outro tribunal da Unión, por estar viciado de ilegalidade e afectar as súas competencias ou intereses, porao en coñecemento da Administración xeral do Estado nun prazo de vinte días naturais contados a partir da publicación ou notificación da disposición ou acto que pretenda impugnarse. Esta comunicación farase a través da persoa representante de Galicia que forme parte da Conferencia para Asuntos Relacionados coa Unión Europea (CARUE).

3. Igualmente, se a Xunta de Galicia tiver interese en que o Reino de España interveña como coadxuvante nun procedemento ante o Tribunal de Xustiza da UE ou calquera outro tribunal da Unión por entender que a sentenza que se poida ditar

pode afectar as súas competencias ou intereses lexítimos, porao en coñecemento da Administración xeral do Estado, pola mesma canle precisada no número anterior, no prazo dun mes contado a partir da publicación do recurso no Diario Oficial de la Unión Europea ou no sitio oficial que determine alternativamente a Unión.

4. En caso de que a Xunta de Galicia considere que unha institución da Unión se abstivo de actuar, causándolle con iso un prexuízo a Galicia, poderá solicitar, a través da persoa representante que forme parte da Conferencia para Asuntos Relacionados coa Unión Europea (CARUE), que o Reino de España requira á devandita institución para que actúe e, se for o caso, interpoña ante o Tribunal de Xustiza un recurso de inacción.

5. A Xunta de Galicia poderá solicitar ademais aos órganos competentes do Estado español calquera outra actuación xurídica ante o Tribunal de Xustiza ou ante calquera outro Tribunal da Unión que resulte de acordos subscritos entre a Administración xeral do Estado e as comunidades autónomas.

6. A representación, defensa e asesoramento xurídico nos asuntos que atinxan a Comunidade Autónoma de Galicia e que se traten ante o Tribunal de Xustiza da Unión Europea, cando a normativa procesual aplicable o permita, corresponderán ao persoal letrado da Xunta de Galicia, axustándose á normativa de asistencia xurídica da Administración xeral da Comunidade Autónoma de Galicia e do seu sector público.

CAPÍTULO II

Acción exterior en Europa fóra do marco xurídico da UE

Artigo 37. Fundamentos da acción exterior galega en Europa fóra da UE

1. A Xunta de Galicia desenvolverá a súa acción exterior europea fóra do ámbito institucional e orgánico da Unión Europea con pleno respecto á normativa española e da Unión, de conformidade co prescrito na Estratexia de acción exterior de España e na propia Estratexia galega de acción exterior.

2. A Xunta de Galicia velará para que os restantes suxeitos públicos da acción exterior galega observen igualmente a citada normativa e prescricións estratéxicas.

3. A Xunta de Galicia impulsará a participación de Galicia nas redes europeas de cooperación territorial, co fin de fortalecer o seu posicionamento a nivel internacional, favorecendo a defensa dos intereses globais conxuntos cos demais membros de cada rede. Ademais, incrementará os vínculos con aquelas asociacións

e territorios cos que Galicia garde complementariedades ou afinidades socioeconómicas ou histórico-culturais.

Artigo 38. Participación en redes europeas de cooperación rexional

A Xunta de Galicia participará naquelas redes europeas de cooperación rexional que teñan como obxectivo a defensa dos intereses xerais das rexións fronteirizas e favorezan o desenvolvemento rexional e a cohesión territorial en Europa, especialmente na Conferencia de Rexións Periféricas e Marítimas de Europa (CRPM) e na Asociación Europea de Rexións Fronteirizas (ARFE), así como en calquera outras que se institúan ou que a propia Xunta de Galicia promova.

TÍTULO VI

Tratados e outros instrumentos e acordos internacionais

CAPÍTULO I

Negociación de tratados

Artigo 39. Participación por instancia galega en delegacións españolas no exterior e na negociación de tratados

1. Se un departamento da Xunta de Galicia estima conveniente ou precisa a participación autonómica galega nunha delegación oficial española que se desprace ao exterior para preparar ou negociar un tratado que incida en competencias ou intereses galegos, o devandito departamento comunicará a súa intención ao centro directivo responsable de velar polo desenvolvemento e execución da Egaex, para que este realice as xestións necesarias ante o Ministerio competente en asuntos exteriores.

Aquela comunicación ao centro directivo responsable de velar polo desenvolvemento e execución da Egaex acompañarase da seguinte documentación:

- a) Memoria xustificativa sobre as competencias ou intereses galegos afectados.
- b) Informe da asesoría xurídica do departamento ou, se for o caso, do servizo xurídico da entidade interesada.

c) Avaliación económica e orzamentaria.

d) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

2. Cando, a criterio dun departamento da Xunta de Galicia, for indispensable ou recomendable que España inicie negociacións con outro Estado ou organización internacional para asinar un tratado en defensa dos lexítimos dereitos ou intereses de Galicia, ou se estimar oportuno que autoridades ou funcionarios da Xunta de Galicia se incorporen a unha delegación oficial española no exterior co propósito de iniciar ou desenvolver conversas tendentes á negociación dun tratado, procederase do seguinte xeito:

a) O departamento propoñente elaborará unha memoria xustificativa e senllos informes de natureza económica e xurídica ao respecto. Os devanditos documentos serán remitidos ao centro directivo responsable de velar polo desenvolvemento e execución da Egaex, que, pola súa vez, procederá á súa valoración e elaborará o seu propio informe á luz do dereito internacional aplicable, así como un documento de prospectiva de condicionantes políticos internacionais que concorran no caso. Ademais poderá solicitar informes adicionais a organismos, entidades e expertos destacados que considere idóneos.

b) Toda a documentación citada se remitirá cunha proposta ao superior do centro directivo responsable de velar polo desenvolvemento e execución da Egaex, quen informará á persoa titular da consellería que valorará a súa elevación ao Consello da Xunta de Galicia.

c) Se o Consello da Xunta de Galicia estima a procedencia de solicitar á Administración xeral do Estado a participación autonómica nos contactos preliminares ou nas negociacións propiamente ditas para a sinatura dun tratado, a persoa titular da Presidencia da Xunta de Galicia cursará a solicitude galega á persoa titular do Ministerio competente en asuntos exteriores.

d) As persoas representantes de Galicia nas referidas delegacións exteriores españolas ou nos equipos negociadores de tratados trasladarán copia das notas e actas que elaboren, así como dos documentos a que accedan, ao centro directivo responsable de velar polo desenvolvemento e execución da Egaex, que, pola súa vez, poderá destacar a persoal especializado en apoio das persoas representantes autonómicas. En calquera caso, as persoas representantes de Galicia elaborarán informes reservados, que se remitirán coa periodicidade que determine o centro directivo responsable de velar polo desenvolvemento e execución da Egaex. Sempre se manterá a reserva, sxiilo, confidencialidade ou segredo que determine a

autoridade ou funcionario/a que presida a delegación ou equipo español en que se integren as autoridades ou persoal funcionario galego.

Artigo 40. Participación galega por invitación estatal en delegacións españolas no exterior e na negociación de tratados

1. Cando un departamento da Xunta de Galicia for invitado por outro da Administración xeral do Estado a participar nunha delegación oficial española que se desprace ao exterior para preparar ou negociar un tratado, o devandito departamento comunicará o seu parecer ao centro directivo responsable de velar polo desenvolvemento e execución da Egaex, que o trasladará, se for oportuno, ao Ministerio competente en asuntos exteriores. Aquela comunicación ao centro directivo responsable de velar polo desenvolvemento e execución da Egaex acompañarase da seguinte documentación:

- a) Memoria xustificativa sobre as competencias ou intereses galegos afectados.
- b) Informe da asesoría xurídica do departamento ou, se for o caso, do servizo xurídico da entidade interesada.
- c) Avaliación económica e orzamentaria.
- d) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

2. Cando un departamento da Xunta de Galicia for invitado por outro da Administración xeral do Estado a participar nunha delegación oficial española que se desprace ao exterior para iniciar ou desenvolver negociacións con outro Estado ou organización internacional co obxecto de asinar un tratado, ou para que autoridades ou persoal funcionario da Xunta de Galicia se incorporen a unha delegación oficial española no exterior co propósito de iniciar ou desenvolver conversas tendentes á negociación dun tratado, procederase do seguinte xeito:

- a) O departamento autonómico que recibise a proposta estatal elaborará unha memoria xustificativa e senllos informes de natureza económica e xurídica ao respecto. Os devanditos documentos serán remitidos ao centro directivo responsable de velar polo desenvolvemento e execución da Egaex, que, pola súa vez, procederá á súa valoración e elaborará o seu propio informe á luz do dereito internacional aplicable, así como un documento de perspectiva de condicionantes políticos internacionais que concorran no caso. Ademais, ~~este~~ poderá solicitar informes adicionais a organismos, entidades e persoal experto destacado que considere idóneos.

b) Á vista dos anteriores informes, elaborará o seu propio informe-proposta, que elevará ao seu conselleiro/a superior xerárquico/a.

c) O/A conselleiro/a antedito/a valorará a súa elevación ao Consello da Xunta de Galicia, para que este autorice ou desautorice a participación galega solicitada pola Administración xeral do Estado. No caso de que a autorice, precisará os condicionantes e alcance desa participación, e o centro directivo responsable de velar polo desenvolvemento e execución da Egaex comunicaráo, ademais, ao Ministerio competente en asuntos exteriores.

d) As persoas representantes de Galicia nas delegacións exteriores españolas ou nos equipos negociadores de tratados por instancia da Administración xeral do Estado tamén trasladarán copia das notas e actas que elaboren, así como dos documentos a que accedan, ao centro directivo responsable de velar polo desenvolvemento e execución da Egaex, que, pola súa vez, poderá destacar a persoal especializado en apoio das persoas representantes autonómicas. En calquera caso, as persoas representantes de Galicia elaborarán informes reservados que se remitirán coa periodicidade que determine o centro directivo responsable de velar polo desenvolvemento e execución da Egaex. Sempre se manterá a reserva, sexilo, confidencialidade ou segredo que determine a autoridade ou funcionario/a que presida a delegación ou equipo español en que se integren as autoridades ou persoal funcionario galego.

CAPÍTULO II

Execución de tratados

Artigo 41. Cooperación na execución de tratados

1. A Comunidade Autónoma de Galicia cooperará coa Administración Xeral do Estado na execución dos tratados que ratifique o Reino de España e/ou a Unión Europea en asuntos que atinxan a competencias autonómicas.

2. Na hipótese de dúbida sobre o xeito máis atinado de execución daqueles tratados, a persoa titular da Presidencia da Xunta de Galicia, previa xustificación da súa especial transcendencia para a Comunidade Autónoma por parte do órgano competente por razón da materia, poderá solicitar ditame ao Consello Consultivo de Galicia, mesmo polo procedemento de urxencia.

3. Se para a execución dun tratado na Comunidade Autónoma de Galicia fose necesario realizar modificacións no seu ordenamento xurídico, estas realizaranse á maior brevidade e polo procedemento legal máis abreviado.

4. A Comunidade Autónoma de Galicia comunicará oficialmente ao Ministerio competente en asuntos exteriores copias dos proxectos normativos preparados para dar execución a un tratado co tempo preciso para que o devandito Ministerio poida realizar as observacións que estime oportunas e máis copias dos textos normativos unha vez aprobados.

Artigo 42. Coordinación co Ministerio competente en asuntos exteriores para a execución de tratados

1. A Comunidade Autónoma de Galicia coordinarase puntualmente co Ministerio competente en asuntos exteriores para garantir a máxima seguridade xurídica na execución dos tratados que lle atinxan e para trasladar aos restantes Estados ou Organizacións Internacionais partes deses tratados as garantías pertinentes.

2. A estes efectos, as suxestións do Ministerio competente en asuntos exteriores serán informadas pola Asesoría Xurídica Xeral e polo centro directivo responsable de velar polo desenvolvemento e execución da Egaex.

3. Cando se estimase indispensable, a persoa titular da Presidencia da Xunta poderá solicitar ditame ao respecto do Consello Consultivo de Galicia.

CAPÍTULO III

Acordos internacionais administrativos

Artigo 43. Acordo internacional administrativo por iniciativa galega

1. O departamento autonómico ou entidade instrumental dependente del que propoña a celebración dun acordo internacional administrativo deberá informar, xa ao iniciar os pertinentes contactos exteriores, ao centro directivo responsable de velar polo desenvolvemento e execución da Egaex.

2. Posteriormente, a autoridade que propoña a celebración dun acordo internacional administrativo negociará coa autoridade pública foránea o contido material do acordo, podendo solicitar o asesoramento do centro directivo responsable de velar polo desenvolvemento e execución da Egaex.

3. Unha vez que se consensúe un texto básico, deberá remitilo oficialmente ao centro directivo responsable de velar polo desenvolvemento e execución da Egaex xunto co seu correspondente informe exhaustivo, e antes do peche das súas deliberacións coa contraparte estranxeira, cunha proposta que achegará ademais a seguinte documentación:

a) Copia do tratado que será executado ou concretado polo acordo internacional administrativo proposto.

b) Borrador final do acordo internacional administrativo proposto.

c) Informe do servizo xurídico do departamento ou entidade proponente.

d) Informe técnico sobre as materias incluídas no acordo, elaborado polos servizos competentes do departamento ou entidade proponente.

e) Memoria económica sobre o impacto do acordo sobre os sectores afectados.

f) Avaliación do custo orzamentario previsto durante o período de vixencia do acordo.

g) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

4. Unha vez examinada a documentación achegada, o centro directivo responsable de velar polo desenvolvemento e execución da Egaex, dará traslado de toda a documentación ao Ministerio competente en asuntos exteriores.

5. A sinatura destes acordos será realizada polo Presidente da Xunta de Galicia en representación desta ou, por delegación daquel, polo Conselleiro que determine. Así mesmo, a persoa titular da Presidencia poderá delegar a sinatura nos altos cargos competentes en materia de acción exterior ou de emigración.

Artigo 44. Acordo internacional administrativo por iniciativa dunha autoridade exterior

1. O departamento autonómico ou entidade instrumental dependente del que reciba a proposta exterior de celebración dun acordo internacional administrativo deberá remitir inmediatamente ao centro directivo responsable de velar polo desenvolvemento e execución da Egaex, e sempre antes do peche dos seus contactos coa contraparte estranxeira, unha proposta que achegará ademais a seguinte documentación:

- a) Copia do tratado que será executado ou concretado polo acordo internacional administrativo proposto.
- b) Borrador do acordo internacional administrativo proposto pola autoridade exterior.
- c) Informe da asesoría xurídica do departamento ou, se for o caso, do servizo xurídico da entidade interesada.
- d) Informe técnico sobre as materias incluídas no acordo, elaborado polos servizos competentes do departamento ou entidade interesada.
- e) Memoria económica sobre o impacto do acordo sobre os sectores afectados en Galicia.
- f) Avaliación do custo orzamentario previsto para Galicia durante o período de vixencia do acordo.
- g) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

2. Unha vez examinada a documentación achegada, o centro directivo responsable de velar polo desenvolvemento e execución da Egaex, dará traslado de toda a documentación ao Ministerio competente en asuntos exteriores. Se a contraparte estranxeira non acepta as propostas de modificación engadidas ao texto que se lle traslade, incorporarase á comisión negociadora unha persoa representante do centro directivo responsable de velar polo desenvolvemento e execución da Egaex, co fin de adecuar o texto aos requisitos galegos e españois exixibles.

3. A sinatura destes acordos será realizada polo Presidente da Xunta de Galicia en representación desta ou, por delegación daquel, polo Conselleiro que determine. Así mesmo, a persoa titular da Presidencia poderá delegar a sinatura nos altos cargos competentes en materia de acción exterior ou de emigración.

CAPÍTULO IV

Acordos internacionais non normativos

Artigo 45. Acordo internacional non normativo por iniciativa galega

1. O departamento autonómico ou entidade instrumental dependente del que propoña a celebración dun acordo internacional non normativo intentará adecuarse ao modelo de memorando de entendemento que lle proporcione o centro directivo

responsable de velar polo desenvolvemento e execución da Egaex. En todo caso, deberá informar xa ao iniciar os seus contactos coa correspondente autoridade exterior, ao centro directivo responsable de velar polo desenvolvemento e execución da Egaex, podendo solicitar o seu asesoramento.

2. Posteriormente, o departamento ou entidade que propoña a celebración dun acordo internacional non normativo negociará coa autoridade foránea o contido material do acordo.

3. Unha vez que se consensúe un texto, deberá remitir oficialmente ao centro directivo responsable de velar polo desenvolvemento e execución da Egaex, e antes do peche dos seus contactos coa contraparte estranxeira, unha proposta que achegará ademais a seguinte documentación:

a) Borrador do acordo internacional non normativo proposto, axeitado o máis posible ao modelo de memorando de entendemento que se lle tivese facilitado.

b) Informe do servizo xurídico do departamento ou entidade propoñente.

c) Memoria económica sobre o impacto do acordo sobre os sectores afectados.

d) Avaliación do custo orzamentario previsto durante o período de vixencia do acordo.

e) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

4. Unha vez examinada a documentación achegada, o centro directivo responsable de velar polo desenvolvemento e execución da Egaex, dará traslado de toda a documentación ao Ministerio competente en asuntos exteriores.

5. A sinatura destes acordos será realizada polo Presidente da Xunta de Galicia en representación desta ou, por delegación daquel, polo Conselleiro que determine. Así mesmo, a persoa titular da Presidencia poderá delegar a sinatura nos altos cargos competentes en materia de acción exterior ou de emigración.

Artigo 46. Acordo internacional non normativo por iniciativa dunha autoridade exterior

1. O departamento autonómico ou entidade instrumental dependente del que reciba a proposta exterior de celebración dun acordo internacional non normativo deberá remitir inmediatamente ao centro directivo responsable de velar polo desenvolvemento e execución da Egaex, e sempre antes do peche dos seus

contactos coa contraparte estranxeira, unha proposta que achegará ademais a seguinte documentación:

- a) Borrador do acordo internacional non normativo proposto pola autoridade exterior.
- b) Informe da asesoría xurídica do departamento ou, se é o caso, do servizo xurídico da entidade interesada.
- c) Memoria económica sobre o impacto do acordo sobre os sectores afectados en Galicia.
- d) Avaliación do custo orzamentario previsto para Galicia durante o período de vixencia do acordo.
- e) O informe do órgano superior da Administración xeral da Xunta de Galicia competente en materia de igualdade cando a materia obxecto de negociación teña repercusións en cuestións de xénero.

2. O departamento ou entidade autonómica que reciba a proposta exterior de celebración dun acordo internacional non normativo intentará, durante o proceso negociador coa autoridade exterior, que o documento que haxa que asinar se acomode o máis posible ao modelo de memorando de entendemento que lle facilite o centro directivo responsable de velar polo desenvolvemento e execución da Egaex.

3. Unha vez examinada a documentación achegada, o centro directivo responsable de velar polo desenvolvemento e execución da Egaex dará traslado de toda a documentación ao Ministerio competente en asuntos exteriores. Se a contraparte estranxeira non acepta as propostas de modificación engadidas ao texto que se lle traslade, incorporarase á comisión negociadora unha persoa representante do centro directivo responsable de velar polo desenvolvemento e execución da Egaex, co fin de adecuar o texto aos requisitos galegos e españois exixibles.

4. A sinatura destes acordos será realizada polo Presidente da Xunta de Galicia en representación desta ou, por delegación daquel, polo Conselleiro que determine. Así mesmo, a persoa titular da Presidencia poderá delegar a sinatura nos altos cargos competentes en materia de acción exterior ou de emigración.

CAPÍTULO V

Outros acordos de suxeitos públicos

Artigo 47.- Acordos de entidades públicas locais e de entidades non territoriais

1. As entidades públicas locais e mais as non territoriais, como son as universidades públicas, as cámaras de comercio ou os colexios profesionais, poderán concordar acordos internacionais non normativos con outras entidades equivalentes doutros estados, sempre que fosen compatibles coa Egaex. A estes efectos, a denominación do documento asinado será indiferente para determinar a súa natureza xurídica como acordo internacional non normativo.

2. Os acordos de irmandamento entre entidades públicas locais galegas e entidades públicas equivalentes doutro Estado terán a consideración de acordos internacionais non normativos, sendo asinados polo presidente da entidade local, e a súa tramitación realizarase consonte co previsto no artigo seguinte.

Artigo 48.- Procedemento para a realización de acordos por entidades públicas locais e por entidades non territoriais

1. As entidades públicas locais e as non territoriais suxeitas a esta lei deberán remitir ao centro directivo responsable da Egaex a seguinte documentación quince días naturais antes da sinatura de calquera acordo con representantes de entidades públicas do exterior:

- a) Borrador do texto.
- b) Informe do órgano que exerza no seu seo as funcións de asesoramento xurídico.
- c) Informe do órgano que exerza no seu seo as funcións de fiscalización orzamentaria.

2. Examinada esta documentación, o centro directivo responsable da Egaex avaliará a súa legalidade e idoneidade. Se a documentación fose axeitada remitirá copia ao Ministerio competente en asuntos exteriores. Se non fose axeitada, solicitaralle á entidade promotora do acordo a súa adecuación.

3. Se o Ministerio competente en asuntos exteriores non puxese reparos no prazo previsto na normativa estatal, o centro directivo responsable da Egaex comunicarlle esta circunstancia á entidade promotora.

4. Unha vez asinado o acordo, a entidade promotora publicará o mesmo na súa páxina web ou portal de transparencia, dándolle traslado ao centro directivo responsable da Egaex, que ao tempo llo comunicará ao Ministerio competente en asuntos exteriores.
5. Unha vez asinado o acordo, o secretario da entidade dará traslado de copia fidedigna ao centro directivo responsable de velar polo desenvolvemento e execución da Egaex, para o seu rexistro, depósito e comunicación ao Ministerio competente en asuntos exteriores. A ausencia de rexistro e depósito conlevará a nulidade de pleno dereito do devandito acordo.
6. Todos os acordos referidos neste artigo serán asinados canda menos nos dous idiomas oficiais de Galicia. Se se empregasen outros idiomas xuntaranse igualmente copias fidedignas dos mesmos.

CAPÍTULO VI

Comunicación e rexistro dos acordos internacionais

Artigo 49. Comunicación, rexistro e depósito dos acordos

Unha vez subscritos os acordos a que fai referencia este título, o departamento ou entidade autonómica que se encargase da súa tramitación enviará nun prazo inferior a dez días naturais un exemplar orixinal asinado en cada idioma que se tivera empregado, para o seu depósito oficial, ao centro directivo responsable de velar polo desenvolvemento e execución da Egaex. Para as entidades públicas non autonómicas abondará con copia fidedigna. En calquera caso, a ausencia desta comunicación, rexistro e depósito conlevará a nulidade de pleno dereito do referido acordo.

CAPÍTULO VII

Memorandos de entendemento

Artigo 50. Modelos de memorandos de entendemento

1. O centro directivo responsable de velar polo desenvolvemento e execución da Egaex negociará coas autoridades competentes do Ministerio competente en asuntos exteriores a adopción de modelos harmonizados de memorandos de entendemento, que satisfagan os requirimentos das lexislacións estatal e autonómica e que, deste xeito, permitan axilizar os procedementos internos de coordinación entre ambas as dúas administracións, e destas con outras administracións, corporacións ou entidades públicas galegas.

2. En calquera circunstancia, os promotores galegos de acordos internacionais tentarán adecuar as súas propostas aos anteditos modelos harmonizados. De non ser posible, comunicaranlle con suficiente antelación ao centro directivo responsable de velar polo desenvolvemento e execución da Egaex as alternativas que propoñan. Este estudará cada caso e contrastará co Ministerio competente en asuntos exteriores as alternativas que estime máis axeitadas, que haberán ser sempre compatibles co Ordenamento xurídico español.

TÍTULO VII

Accións sectoriais no exterior

CAPÍTULO I

Acción exterior no eido transversal

Sección 1ª. Acción exterior en materia de emigración

Artigo 51. Galegos do exterior

A acción exterior en materia de emigración velará especialmente pola salvagarda dos dereitos sociais e económicos de todos os galegos residentes no exterior e dos

seus descendentes, así como das comunidades galegas asentadas fóra de Galicia. Fomentará así mesmo o mantemento dos seus vínculos lingüísticos e culturais.

Artigo 52. Acción exterior en materia de retorno

A acción exterior en materia de retorno estará orientada a facilitar o regreso a Galicia das persoas galegas residentes no exterior e das súas familias, levando a cabo políticas de información, orientación e seguimento en todo o proceso, para conseguir unha plena integración na sociedade galega.

Sección 2ª. Emerxencias

Artigo 53. Desprazamento ao exterior de equipos de protección civil ou emerxencias financiados por recursos públicos galegos

1. Cando se requira ou ofrezca axuda internacional que atinxa a equipos de protección civil ou emerxencias financiados por recursos públicos galegos comunicarase inmediatamente ao centro directivo responsable de velar polo desenvolvemento e execución da Egaex, que ao tempo llo trasladará ao Ministerio competente en asuntos exteriores, para garantir a cobertura de calquera incidencia polas autoridades diplomáticas e consulares españolas sobre o terreo, que poderán coordinar as actuacións destes equipos en concordancia coas autoridades locais e cos responsables da Unión Europea e axencias internacionais sobre o terreo.
2. Calquera incidencia de saúde que padeza este persoal galego co gallo do seu desprazamento ao exterior será cuberta ao seu regreso a Galicia polo Servizo Galego de Saúde.

Sección 3ª. Formación do persoal público

Artigo 54. Formación de persoal empregado público en materias de interese europeo e internacional

1. A Escola Galega de Administración Pública dará audiencia ao centro directivo responsable de velar polo cumprimento e execución da Egaex, para prever as necesidades formativas do persoal empregado público ao que se poida dirixir a Escola no que atinxa ao desenvolvemento e aplicación desta lei e á execución da

Egaex. A devandita audiencia poderase artellar a través dunha comisión mixta de seguimento de composición paritaria.

2. Sen prexuízo do anterior, poderase tentar a cooperación coas universidades galegas e con outros centros universitarios e especializados, preferentemente de titularidade pública, tanto españois como europeos ou mesmo de terceiros Estados.

CAPÍTULO II

Acción exterior no eido de Facenda

Sección 1ª. Planificación económica

Artigo 55. Consideración do entorno europeo e internacional na planificación económica

O centro directivo autonómico que teña encomendada a responsabilidade de efectuar a planificación económica poderá reclamar a cooperación do centro directivo responsable de velar polo desenvolvemento e execución da Egaex e máis da Fundación Galicia Europa no ámbito da información, estudos e lexislación, de ámbito comunitario ou internacional.

Sección 2ª. Fondos da UE

Artigo 56. Negociación, programación e xestión dos Fondos da UE a prol de Galicia

O centro directivo responsable de velar polo desenvolvemento e execución da Egaex e mailos centros directivos responsables de efectuar a planificación económica galega e a xestión dos Fondos da UE manterán a máis estreita cooperación e coordinación co obxectivo de atinxir o mellor resultado posible na fase negociadora dos marcos financeiros plurianuais, dos programas operativos de interese para Galicia e da normativa europea de implementación deses recursos.

CAPÍTULO III

Acción exterior medioambiental e cambio climático

Artigo 57. Cooperación ambiental exterior

1. Na realización de avaliacións ambientais estratéxicas sometidas á Directiva 2001/42/CE do Parlamento Europeo e do Consello de 27 de xuño de 2001 relativa á avaliación dos efectos de determinados plans e programas no medio ambiente, as autoridades ambientais galegas realizarán as pertinentes consultas transfronteirizas, mesmo no caso de dúbida razoable da súa obrigatoriedade, coas autoridades portuguesas por medio de GNP, AECT.

2. A transposición de directivas ambientais, o desenvolvemento de regulamentos da mesma área e a aplicación de tratados internacionais ambientais por parte da Comunidade Autónoma de Galicia requirirá tamén, mesmo no caso de dúbida razoable, a consulta previa coas autoridades portuguesas por medio de GNP, AECT.

CAPÍTULO IV

Acción exterior no eido da Mobilidade

Artigo 58. Conectividade aérea internacional

1. As axudas públicas, subvencións ou estímulos de calquera caste que as Administracións Públicas galegas teñan previsto outorgar a compañías ou operadores de transporte aéreo precisarán ser comunicadas en fase de proxecto ao centro directivo responsable de velar polo desenvolvemento e execución da Egaex.

2. Os proxectos das anteditas axudas, subvencións ou estímulos serán avaliadas polo centro directivo competente da Xunta de Galicia á luz do Dereito da UE e consonte coa Lei 9/2007, de 13 de xuño, de subvencións de Galicia e coa súa normativa de desenvolvemento.

3. A estes efectos requirirase informe previo do centro directivo autonómico competente en materia de mobilidade, que tomará en consideración a normativa sectorial correspondente a fin de asegurar a meirande conectividade internacional posible.

4. Serán nulas todas as axudas públicas, subvencións e estímulos previstos no número 1 deste artigo cuxos proxectos non fosen comunicados consonte o previsto nel.

CAPÍTULO V

Acción exterior no eido da Economía

Sección 1ª. Comercio no Mercado Interior, comercio exterior e captación de investimentos e inmigrantes

Artigo 59. Mercado Interior

1. Para mellorar o aproveitamento das vantaxes do Mercado Interior europeo, a Xunta de Galicia tomará en consideración as mellores prácticas avaladas pola Dirección Xeral competente na materia da Comisión Europea.
2. A Xunta de Galicia favorecerá a prestación de servizos transfronteirizos dos operadores galegos dentro do Mercado Interior europeo mediante os correspondentes estudos de mercado para aproveitar as vantaxes competitivas daqueles.

Artigo 60. Comercio exterior

1. A Administración autonómica primará a diversificación internacional do comercio exterior desenvolvido polas empresas radicadas en Galicia.
2. Cando a Administración observe unha excesiva concentración de riscos sistémicos convocará ás cámaras de comercio galegas e ás asociacións sectoriais atinxidas para elaborar plans de continxencia que inclúan a pescuda de novos mercados.
3. A Administración realizará anualmente unha convocatoria ás cámaras de comercio galegas e ás asociacións sectoriais coa finalidade de revisar a prioridade de mercados obxectivo e a fixación de novos mercados obxectivo a medio prazo.

Artigo 61. Captación de investimentos produtivos

1. Durante o primeiro trimestre de cada ano natural logo da entrada en vigor desta lei o Consello da Xunta de Galicia examinará o estudo “Doing business” do Banco Mundial, aos efectos de avaliar a posta en marcha das medidas precisas dentro das competencias autonómicas para mellorar a atracción de capital foráneo adicado a investimentos produtivos. Asemade, cadrando con esa obriga se tomarán en consideración outros informes oficiais da Comisión Europea e de Organizacións Internacionais nas que España sexa Estado membro.
2. Cando os atrancos ou retrasos aos investimentos de capital foráneo procedan doutras Administracións galegas, a Xunta de Galicia promoverá as modificacións indispensables para situar a Galicia no chanzo superior das Administracións máis eficientes en tempo e custos do entorno da Unión Europea.
3. Todos os investimentos produtivos de capital foráneo beneficiaranse canda menos das medidas previstas na Lei 5/2017, do 19 de outubro, de fomento da implantación de iniciativas empresariais en Galicia.

Artigo 62. Captación de inmigrantes en países prioritarios

1. A Xunta de Galicia desenvolverá iniciativas recorrentes para estimular o asentamento no territorio galego de nacionais dos Estados e territorios previstos na Egaex.
2. As iniciativas anteditas deberán acomodarse en calquera caso ás directrices das autoridades españolas e da Unión Europea, sen prexuízo de que as autoridades galegas realicen as xestións precisas para trasladar as necesidades estruturais galegas neste eido.
3. Priorizarase o asentamento dos inmigrantes referidos neste artigo nos concellos e bisbarras que precisen dun meirande dinamismo poboacional.

Sección 2ª. Acción exterior no I+D+i

Artigo 63. Polo de excelencia cara ó exterior

- 1.- A Administración autonómica promoverá Galicia como polo de excelencia no coñecemento e a investigación, na innovación e na capacidade innovadora da súa economía.

2.- A Administración autonómica potenciará as relacións de colaboración cos organismos e organizacións internacionais no ámbito da investigación e a innovación, sendo o marco institucional da Unión Europea o ámbito prioritario.

Artigo 64. *Colaboración cara ó exterior*

1. A Administración autonómica promoverá a participación de persoas físicas, organismos públicos e privados, entidades e empresas do sistema galego de innovación en proxectos e programas de I+D+I internacionais, especialmente os promovidos pola Unión Europea.

2. A Administración autonómica impulsará a participación das administracións, dos organismos públicos e privados, das entidades e das empresas do sistema galego de innovación nas redes interrexionais, paneuropeas e internacionais de coñecemento e de colaboración no ámbito da I+D+I. Así mesmo, promoverá a visibilidade e o posicionamento dos axentes galegos tanto na Unión Europea así como internacionalmente.

3. A Administración autonómica promoverá a mobilidade internacional do persoal investigador e a presenza en institucións internacionais vinculadas á I+D+I, así como a atracción do talento investigador e innovador.

4. No marco das competencias que lle outorgan os tratados internacionais, a Constitución Española, o Estatuto de Autonomía e o resto do Ordenamento xurídico nos termos recollidos no título V da Lei 25/2014 de novembro, a Administración autonómica participará na celebración de tratados internacionais e celebrará outros acordos internacionais que contribúan ós obxectivos das súas políticas de I+D+I.

Artigo 65. *Estratexia de especialización intelixente*

No marco da estratexia de especialización intelixente, a Administración autonómica levará a cabo as actividades oportunas para o seu adecuado desenvolvemento no ámbito interrexional e paneuropeo, de acordo coas necesidades de colaboración reforzada que implica a nivel exterior e tendo en conta as oportunidades de complementariedade e de sinerxía. En especial, Galicia impulsará a integración nas redes, mecanismos e instrumentos postos en marcha tanto a nivel da Unión Europea como noutros ámbitos internacionais, que permitan desenvolver marcos de colaboración ampliada e que estean ligados ás propias estratexias de innovación europeas ou ós instrumentos desenvolvidos no seu ámbito.

CAPÍTULO VI

Acción exterior no eido do ensino e da universidade

Sección 1ª. Ensino

Artigo 66. Obxectivos europeos de cualidade

1. O ensino galego márcase como obxectivo propio atinxir os indicadores de cualidade establecidos pola Unión Europea e acadados polos Estados máis avanzados neste eido.
2. A Administración educativa galega fomentará os intercambios europeos de profesionais do ensino e de estudantes, cunha orientación cara a mellora dos resultados sinalados como clave pola UE.
3. A Xunta de Galicia convidará aos profesionais do ensino a propor as melloras prácticas que rendan resultados positivos no entorno da UE para a súa testaxe mediante proxectos piloto.

Sección 2ª. Universidade

Artigo 67. Internacionalización do Sistema Universitario Galego

1. A Xunta de Galicia primará na financiación universitaria o medre na internacionalización das súas universidades consonte cos indicadores recomendados pola UE.
2. Na liña co previsto no número precedente, estimularase preferentemente a captación de alumnado de países da Lusofonía e dos países que se indiquen como prioritarios na Egaex.
3. A Xunta de Galicia coordinará a promoción exterior das universidades galegas e estimulará a máis estreita cooperación entre elas, buscando a colaboración coas restantes da Eurorrexión en especial cando se dirixan a países da Lusofonía.
4. A Xunta de Galicia deseñará unha política pública de seu orientada a favorecer o establecemento e emprendemento en Galicia dos titulados foráneos nas universidades galegas.

CAPÍTULO VII

Voluntariado social no exterior

Artigo 68. Pulo do voluntariado social galego

A Xunta de Galicia participará nos programas de voluntariado social promovidos polas autoridades da UE, con preferencia naqueles nos que se sumen autoridades portuguesas e doutros países determinados como prioritarios na Egaex.

CAPÍTULO VIII

Acción exterior no eido da cultura, a lingua e o turismo

Artigo 69. Cultura e lingua no exterior

1. A acción exterior na materia de cultura terá como obxectivo a defensa, promoción e difusión dos valores culturais do pobo galego, no marco das competencias establecidas pola Constitución Española e o Estatuto de Autonomía de Galicia.
2. A acción exterior na materia da lingua galega promoverá o ensino da lingua e da literatura, así como as actividades relacionadas coa súa investigación e divulgación, como manifestación dunha cultura diferenciada e como expresión social do pobo galego. Do mesmo xeito impulsará o apoio institucional da utilización e a promoción do galego nas comunidades de fóra de Galicia nas que ten uso e pervivencia.

Artigo 70. Turismo foráneo

1. A acción exterior en materia de turismo orientarase á promoción da imaxe marca-país de Galicia como destino turístico, con especial atención á posta en valor dos Camiños de Santiago, así como á planificación, desenvolvemento, execución e seguimento de actividades de carácter proporcional do sector turístico galego, sen prexuízo das competencias da Administración xeral do Estado e en colaboración coa Organización Mundial do Turismo.
2. Poderán articularse medidas destinadas a fomentar intercambios culturais e accións colaborativas que faciliten o coñecemento do patrimonio cultural de Galicia nas súas diversas manifestacións, a promoción exterior da lingua galega e da imaxe marca-país de Galicia como destino turístico, así como o reforzo da cultura na diáspora e na emigración galega.

CAPÍTULO IX

Acción exterior no eido da Sanidade

Artigo 71. Promoción de servizos sanitarios cara o exterior

A Xunta de Galicia deseñará unha iniciativa de seu para captar demanda de servizos sanitarios de alto valor engadido para a súa prestación en Galicia, semellantes aos desenvolvidos por outros países da UE, aproveitando as vantaxes competitivas e de cualificacións dos nosos profesionais, coa finalidade de xerar en Galicia máis postos de traballo de alto nivel.

CAPÍTULO X

Acción exterior marítima

Artigo 72. Defensa dos intereses do sector do mar no eido exterior

1. A Xunta de Galicia promoverá unha política activa de acordos da UE con terceiros Estados para manter a autonomía europea no aprovisionamento de alimentos e produtos do mar.
2. A Xunta de Galicia poderá estimular a concertación privada de acordos entre actores galegos do sector do mar e autoridades de terceiros Estados para garantir o acceso a augas deses Estados, sempre consonte coa normativa europea e española na materia.

TÍTULO VIII

Cooperación para o desenvolvemento

CAPÍTULO I

Disposicións xerais no eido da cooperación para o desenvolvemento

Artigo 73. A política pública de cooperación para o desenvolvemento

1. A política pública de cooperación para o desenvolvemento inclúe o conxunto de iniciativas, actuacións e recursos que a sociedade galega a través da Administración pública da Comunidade Autónoma de Galicia pon ao servizo das persoas, comunidades, entidades e institucións públicas en países empobrecidos e en vías de desenvolvemento contribuíndo ao logro da axenda global de desenvolvemento humano sustentable co fin de erradicar a pobreza nas súas múltiples dimensións, reducir as desigualdades, promover a realización efectiva dos dereitos humanos, favorecer modelos de produción e consumo sustentables, loitar contra o cambio climático e promover unhas relacións internacionais baseadas na paz e a xustiza.
2. As actuacións en materia de cooperación para o desenvolvemento, en canto expresión do compromiso solidario da sociedade galega coa xustiza global, orientaranse á promoción de cambios positivos, sustentables e a longo prazo nas condicións de vida das persoas para a realización do dereito ao desenvolvemento humano sustentable dos países e pobos cos que cooperan a Administración pública da Comunidade Autónoma e os axentes de cooperación, e contribuirán á construción dunha cidadanía global concienciada e comprometida que apoia e participa nas políticas e actuacións de solidariedade e xustiza social a nivel local e global.
3. As actuacións e recursos que a Administración pública da Comunidade Autónoma destinen a cooperación para o desenvolvemento no exercicio das súas competencias contribuirán ao cumprimento da axenda global de desenvolvemento das Nacións Unidas e do establecido na lexislación estatal nesta materia.
4. Os recursos destinados a cooperación para o desenvolvemento pola Administración pública da Comunidade Autónoma serán aqueles que satisfagan os criterios establecidos a nivel estatal pola Administración Xeral do Estado conforme ao marco internacional de referencia na materia.
5. A axuda oficial ao desenvolvemento da Administración pública da Comunidade Autónoma terá carácter non reembolsable con base no principio de gratuidade.
6. A denominación Cooperación Galega inclúe o conxunto de iniciativas e actuacións en materia de cooperación para o desenvolvemento promovidas pola Administración pública autonómica ben directamente ou ben a través dos axentes de cooperación. Estas iniciativas e actuacións serán identificadas cos logotipos oficiais da Xunta de Galicia e da Cooperación Galega que estableza o centro directivo competente da administración autonómica nesta materia.

Artigo 74. Ámbito de aplicación da cooperación para o desenvolvemento

1. Este título aplicarase a todas as iniciativas, actuacións, e recursos en materia de cooperación para o desenvolvemento humano sustentable e solidariedade internacional da Administración pública da Comunidade Autónoma e do seu sector público dependente.
2. Os principios, obxectivos, criterios e prioridades deste título rexerán a actividade da Administración pública autonómica e das administracións locais en materia de cooperación para o desenvolvemento, sen prexuízo da súa autonomía no exercicio das súas competencias.
3. As prioridades fixadas polo Plan director vixente nesta materia inspirarán as actuacións de cooperación para o desenvolvemento e solidariedade internacional das administracións locais, que tenderán a buscar a coordinación e a complementariedade entre os axentes de cooperación e achegar un valor engadido e diferenciado.

Artigo 75. Principios da Cooperación Galega

Son principios orientadores da política pública de cooperación para o desenvolvemento:

1. A centralidade do ser humano como protagonista e destinatario de toda actuación de cooperación para o desenvolvemento no marco do recoñecemento da súa liberdade e dignidade e da realización efectiva dos dereitos humanos, individuais e colectivos.
2. O desenvolvemento humano sustentable como un proceso multidimensional nos ámbitos social, económico e medioambiental, e como responsabilidade compartida da sociedade e das administracións públicas da Comunidade Autónoma e dos países e pobos cos que se asocia a Cooperación Galega.
3. O respecto á apropiación democrática do proceso de desenvolvemento para que os gobernos e sociedades civís dos países e pobos cos que se asocia a Cooperación Galega exerzan un liderado, autoridade e responsabilidade efectiva tanto sobre as súas políticas e estratexias de desenvolvemento como sobre os seus modelos propios de desenvolvemento social, cultural, económico, político e medioambiental.
4. O aliñamento coas políticas públicas e estratexias de desenvolvemento humano sustentable dos países e pobos cos que se asocia a Cooperación Galega cando teñan sido o resultado dun proceso democrático de diálogo, concertación e

participación da súa sociedade civil organizada e non atenten contra os dereitos humanos, o medio ambiente, a xustiza social e os compromisos adquiridos en convenios internacionais.

5. A gratuidade de tal xeito que as actuacións de cooperación internacional para o desenvolvemento non poderán estar orientadas, nin directa nin indirectamente, á recepción de contraprestacións ou obtención de beneficios materiais, de calquera natureza, polos axentes doadores.

6. O exercicio pleno e integral dos dereitos da infancia, e a igualdade de xénero, o empoderamento e o exercicio pleno e efectivo dos dereitos das mulleres, desenvolvendo actuacións positivas e considerando nas actuacións as diferentes situacións, condicións e necesidades de homes e mulleres, a todos os niveis e nas distintas fases de planificación, execución e avaliación.

7. A xustiza, a liberdade e a igualdade nas relacións entre as persoas, comunidades, pobos e países, así como a prevención e resolución pacífica dos conflitos, fortalecendo a convivencia e a paz.

8. A non discriminación por razóns de sexo, raza, cultura, ideoloxía ou relixión das persoas ou comunidades coas que se coopera, e o respecto á súa identidade, lingua e cultura propias.

9. O benestar, a cohesión e a xustiza sociais para un desenvolvemento económico inclusivo baseado na redistribución equitativa da riqueza e a prosperidade compartida por toda a sociedade.

10. O respecto da independencia das organizacións non gobernamentais e axentes de cooperación na execución de actuacións en materia de cooperación para o desenvolvemento e educación para a cidadanía global, así como da neutralidade e imparcialidade da acción humanitaria.

Artigo 76. *Obxectivos da Cooperación Galega*

Son obxectivos da política pública de cooperación para o desenvolvemento:

1. Contribuír á erradicación da fame, a pobreza e a desigualdade, en todas as súas formas e dimensións, para que todos os seres humanos poidan realizar o seu potencial con dignidade e liberdade, cunha atención específica ás necesidades e demandas das persoas e colectivos máis vulnerables.

2. Promover a sustentabilidade da vida protexendo o planeta contra a degradación, promovendo o consumo, a produción e a xestión sustentables dos recursos naturais,

a conservación da biodiversidade e a loita contra o cambio climático de xeito que se poidan satisfacer as necesidades das xeracións presentes e futuras.

3. Fomentar que todos os seres humanos poidan ampliar as súas opcións e capacidades para gozar dunha vida digna, próspera e plena e que o desenvolvemento económico, social e tecnolóxico se produza con criterios de xustiza social.

4. Fortalecer a capacidade das persoas, comunidades, organizacións e institucións para anticiparse e prever riscos, ameazas, acontecementos adversos ou desastres sendo quen de recuperarse, adaptarse e prosperar despois da crise económica, política, social ou ambiental.

5. Propiciar sociedades pacíficas, xustas e inclusivas dentro dun marco democrático e de respecto e realización dos dereitos humanos, contribuíndo á superación dos contextos e situacións de violencia, vulnerabilidade, exclusión e marxinación económica, política, social ou medioambiental.

6. Impulsar a cultura da solidariedade internacional e a conciencia de cidadanía global, dando resposta á demanda da sociedade galega de participar activamente na realización dos valores de solidariedade e os deberes de xustiza global.

7. Mobilizar na sociedade galega e nas administracións públicas da Comunidade Autónoma os medios e recursos necesarios para contribuír ao logro da axenda global de desenvolvemento das Nacións Unidas mediante a alianza e asociación cos axentes de cooperación e o fortalecemento da súa capacidade.

Artigo 77. Criterios da Cooperación Galega

Son criterios que regulan a execución das actuacións no ámbito da política pública de cooperación para o desenvolvemento:

1. A eficacia e sustentabilidade para garantir a consecución de cambios positivos, sustentables e a longo prazo nas persoas e comunidades, así como a consolidación futura dos resultados de desenvolvemento acadados.

2. A especialización nos ámbitos e sectores de actuación nos que a Cooperación Galega conta con vantaxes comparativas.

3. A concentración de recursos nas prioridades definidas polo Plan director co fin de garantir unha maior eficacia e calidade da axuda e do desenvolvemento.

4. A eficiencia, responsabilidade e transparencia na xestión dos recursos públicos destinados a cooperación para o desenvolvemento, establecendo criterios de avaliación e indicadores que fagan posible a medición do impacto e do logro de resultados para a rendición de contas á sociedade.
5. A previsibilidade e a solvencia da Cooperación Galega para a dotación e desembolso pleno e efectivo dos recursos financeiros comprometidos.
6. A coherencia de políticas para o desenvolvemento humano sustentable realizadas polas administracións públicas, transversalizando os obxectivos da axenda global de desenvolvemento das Nacións Unidas no conxunto das políticas da Administración autonómica e da Administración local, no ámbito das súas respectivas competencias
7. A participación das persoas e comunidades nos países e pobos cos que se coopera e na Comunidade Autónoma en todas as fases do ciclo do proxecto de cooperación, así como a participación dos axentes de cooperación na planificación, seguimento e avaliación desta política pública.
8. A subsidiariedade na implementación das estratexias multinivel, adoptadas tanto na axenda global de desenvolvemento das Nacións Unidas como nas políticas de cooperación da Unión Europea e do Estado, ao nivel máis próximo posible á cidadanía da Comunidade Autónoma e ás persoas e colectivos destinatarios das actuacións.
9. A complementariedade entre as administracións públicas galegas a través da coordinación, colaboración e concertación mutuas, así como coa sociedade civil e outras administracións públicas, institucións, axencias e organizacións internacionais de cooperación, cunha atención específica á promoción de alianzas e relacións estables de traballo cos axentes portugueses de cooperación.

CAPÍTULO II

Planificación, modalidades, prioridades, avaliación, transparencia e rendición de contas da Cooperación Galega

Artigo 78. Planificación da Cooperación Galega

1. A política pública en materia de cooperación para o desenvolvemento da Comunidade Autónoma articularase a través do Plan director da Cooperación Galega para o desenvolvemento, cunha duración de catro anos.

2. O Plan director fundamentarase nos principios, obxectivos, criterios e prioridades deste título. O centro directivo competente en materia de cooperación para o desenvolvemento basearase para a súa formulación na avaliación participativa do Plan director precedente, e habilitará os espazos e mecanismos de consulta oportunos promovendo a participación plural, activa e inclusiva dos axentes de cooperación.

3. O Plan director fixará o marco estratéxico da cooperación para o desenvolvemento nos seus resultados agardados, prioridades xeográficas e sectoriais, modalidades, instrumentos, procesos de avaliación e recursos orzamentarios que orientarán esta política pública durante o seu período de vixencia.

4. O centro directivo competente en materia de cooperación para o desenvolvemento elaborará un plan de acción anual que fixará a programación operativa da Cooperación Galega con base nos resultados, prioridades xeográficas e sectoriais, modalidades e instrumentos, procesos de avaliación e recursos orzamentarios previstos no Plan director vixente.

5. O centro directivo competente en materia de cooperación para o desenvolvemento poderá promover a elaboración participativa de estratexias específicas nas prioridades establecidas nesta lei e no Plan director vixente, complementarias das estratexias e plans sectoriais da Administración Xeral do Estado na materia.

Artigo 79. Modalidades da Cooperación Galega

1. As actuacións de cooperación para o desenvolvemento poderán xestionarse de forma bilateral ou multilateral:

a) A cooperación bilateral consiste nas actuacións de cooperación promovidas polas administracións públicas da Comunidade Autónoma ou da Administración Xeral do Estado ben directamente con institucións públicas ou outras entidades dos países e pobos cos que se coopera, ben indirectamente a través dos axentes de cooperación recoñecidos nesta lei.

b) A cooperación multilateral consiste na participación das administracións públicas da Comunidade Autónoma, dentro das súas competencias, en actuacións de cooperación promovidas por organizacións multilaterais de desenvolvemento, axencias das Nacións Unidas e os seus comités estatais, fondos globais non financeiros de desenvolvemento e a Unión Europea, que teñan por finalidade os obxectivos definidos por esta lei e os resultados e prioridades establecidos no Plan director vixente.

2. Segundo a súa natureza, as actuacións de cooperación para o desenvolvemento poderán levarse a cabo a través das seguintes modalidades:

a) Cooperación en especie e técnica: inclúe a transferencia directa de bens e servizos aos países e pobos cos que se coopera así como a valorización dos servizos prestados pola Administración autonómica e sector público dependente ás persoas e colectivos destinatarios das actuacións de cooperación para o desenvolvemento. A cooperación técnica comprende o conxunto de actuacións centradas no intercambio de coñecementos para a xeración e fortalecemento das capacidades institucionais e dos recursos humanos dos países e pobos cos que se coopera a través da formación, a capacitación e a axuda técnica.

b) Cooperación económica-financeira: comprende as subvencións e axudas financeiras destinadas a actuacións nos seguintes ámbitos:

- Cooperación exterior: abrangue as actuacións que teñan por finalidade facilitar o acceso a bens e servizos básicos nos países e pobos cos que se coopera, o investimento para o aumento do seu capital físico, humano, social e tecnolóxico, e o desenvolvemento sustentable e inclusivo dos seus sectores produtivos, cunha atención específica á economía e o emprendemento sociais, o comercio xusto, o traballo decente, a dotación de estruturas de provisión de microcréditos de carácter solidario, e a tecnoloxía para o desenvolvemento humano.

- Acción humanitaria e axuda de emerxencia: consiste nas actuacións de asistencia, socorro, protección, rehabilitación e reconstrución en favor das persoas e comunidades afectadas por desastres naturais, guerras ou conflitos armados, así como das poboacións en situación de vulnerabilidade extrema, cun enfoque de dereitos humanos e impulsando a protección das vítimas e a aplicación do dereito internacional humanitario. Tamén inclúe as actuacións de prevención de desastres e redución e mitigación de riscos cun enfoque de resiliencia, a axuda alimentaria e sanitaria de emerxencia e a asistencia a persoas refuxiadas, desprazadas internas e migrantes forzosas.

- Educación para a cidadanía global: comprende as actuacións que promoven na sociedade a conciencia de interdependencia global e a responsabilidade compartida a través dun proceso educativo orientado á transformación social e que fomenta a sensibilización solidaria, a concienciación crítica e a mobilización activa da cidadanía na erradicación da pobreza, a defensa dos dereitos humanos, a promoción da cultura da paz, e o compromiso coa xustiza social e o desenvolvemento humano sustentable a nivel local e global. Dentro da educación para a cidadanía global quedan incluídas as actuacións de sensibilización, concienciación da sociedade galega, incidencia e investigación en materia de cooperación para o desenvolvemento.

c) Formación en cooperación para o desenvolvemento: inclúe as iniciativas, actuacións e recursos para o reforzamento da capacidade institucional dos axentes de cooperación e para a mellora da capacitación nesta materia dos recursos humanos das administracións públicas da Comunidade Autónoma, do persoal voluntario e contratado vinculado a actividades de cooperación, e da cidadanía en xeral.

Artigo 80. Prioridades da Cooperación Galega

1. A Cooperación Galega para o desenvolvemento asociarase prioritariamente con aqueles países e pobos nos que concorran algunha ou varias das seguintes circunstancias:

- a) Situacións de maior pobreza e desigualdades, en función de indicadores internacionalmente aceptados, como o índice de desenvolvemento humano ou o nivel de ingreso.
- b) Transgresións graves e xeralizadas dos dereitos humanos.
- c) Conflitos ou situacións de emerxencia humanitaria.
- d) Experiencia e traxectoria estable e consolidada de traballo coa sociedade galega e os seus axentes de cooperación.
- e) Relacións culturais e históricas coa sociedade galega e os seus axentes de cooperación, especialmente nos ámbitos lusófono e hispano.
- f) Xeración de maiores fluxos migratorios e de poboación refuxiada.

2. A Cooperación Galega para o desenvolvemento intervirá prioritariamente nos seguintes ámbitos ou sectores:

- a) Exercicio dos dereitos sociais básicos (saúde, educación, alimentación, hábitat e auga e saneamento básico) polas persoas e colectivos máis pobres e vulnerables.
- b) Agricultura, pesca e acuicultura sustentables cun enfoque de soberanía alimentaria.
- c) Desenvolvemento rural, local e territorial integrado, inclusivo, solidario e redistributivo para unha prosperidade compartida.
- d) Protección do medio ambiente e promoción da xustiza ecolóxica na loita contra o cambio climático e a conservación e recuperación da biodiversidade.

e) Fortalecemento da sociedade civil, o bo goberno e a gobernabilidade democrática, e das capacidades humanas e institucionais dos países e pobos cos que se coopera.

f) Igualdade de xénero e empoderamento e exercicio pleno e integral de dereitos das mulleres e da infancia.

g) Protección e exercicio dos dereitos humanos, prevención e resolución pacífica dos conflitos, e promoción da cultura da paz e da diversidade cultural.

h) Acción humanitaria e axuda de emerxencia.

i) Educación para a cidadanía global.

j) Formación e capacitación dos axentes de cooperación e da cidadanía en xeral.

3. As actuacións da Cooperación Galega para o desenvolvemento atenderán prioritariamente a persoas e grupos de poboación en situación de vulnerabilidade ou en risco de marxinación ou exclusión, cunha atención preferente a aqueles colectivos que poden ser obxecto de múltiples discriminacións.

4. As actuacións da Cooperación Galega para o desenvolvemento deberán integrar as seguintes prioridades de xeito transversal: a erradicación da pobreza multidimensional, a igualdade de xénero, a defensa da sustentabilidade ambiental e a loita contra o cambio climático, o enfoque baseado en dereitos humanos, o respecto pola diversidade cultural e a promoción da interculturalidade, a equidade e loita contra as desigualdades, a participación cidadá e o fortalecemento institucional e da sociedade civil.

5. O Plan director materializará e actualizará o conxunto de prioridades a través da participación e diálogo cos axentes de cooperación e con base nos estudos e avaliacións dispoñibles.

Artigo 81. Xestión do coñecemento, avaliación, transparencia e rendición de contas da Cooperación Galega

1. O centro directivo competente en materia de cooperación para o desenvolvemento promoverá a aprendizaxe colectiva e o fortalecemento da capacidade para a xestión do coñecemento dos axentes de cooperación a través da realización de estudos e investigacións e a habilitación de espazos e mecanismos para o intercambio de coñecementos e boas prácticas no logro de resultados de desenvolvemento.

2. O centro directivo competente en materia de cooperación para o desenvolvemento promoverá a rendición de contas á sociedade galega a través da avaliación do Plan director vixente, dos instrumentos de cooperación e das actuacións financiadas con fondos públicos da administración autonómica. A avaliación rexeráse polos criterios básicos de pertinencia, eficacia, eficiencia, impacto e sustentabilidade e pola metodoloxía de avaliación da cooperación española e da Unión Europea, integrando o enfoque de xénero e de dereitos humanos.

3. A Xunta de Galicia, en cumprimento do marco xurídico en materia de transparencia, bo goberno e participación cidadá da Comunidade Autónoma, garantirá o acceso e dispoñibilidade de información actualizada sobre os desembolsos de axuda oficial ao desenvolvemento e os impactos e resultados acadados pola política pública de cooperación.

4. Todas as actuacións da Administración pública autonómica nesta materia serán difundidas e accesibles á cidadanía a través do portal de transparencia da Xunta de Galicia ou da páxina web específica da Cooperación Galega para o desenvolvemento.

CAPÍTULO III

Organización institucional da Cooperación Galega

Artigo 82. Consello da Xunta de Galicia e conselleiro competente en materia de cooperación para o desenvolvemento

1. O Consello da Xunta de Galicia formulará, dirixirá e avaliará a política pública da administración autonómica en materia de cooperación para o desenvolvemento.

2. Correspóndelle ao Consello da Xunta de Galicia:

a) Aprobar o proxecto de Plan director, a proposta do conselleiro ou conselleira competente en materia de cooperación para o desenvolvemento e tras recibir o informe do Consello Galego de Cooperación para o Desenvolvemento, e remitirlllo ao Parlamento de Galicia para a súa aprobación.

b) Aprobar o Plan de acción anual, a proposta do conselleiro ou conselleira competente e tras recibir o informe do Consello Galego de Cooperación para o Desenvolvemento, e informar ao Parlamento de Galicia da súa aprobación.

c) Remitir ao Parlamento de Galicia un informe cuadrienal sobre a avaliación final do Plan Director, elaborado polo centro directivo competente en materia de cooperación para o desenvolvemento.

Artigo 83. Centro directivo competente en materia de cooperación para o desenvolvemento

1. O centro directivo competente en materia de cooperación para o desenvolvemento ten a responsabilidade de promover, organizar e executar a política que leve a cabo a Comunidade Autónoma de Galicia neste ámbito.

2. Correspóndelle a este centro directivo:

a) Elaborar o anteproxecto do Plan director e dos plans de acción anuais, que serán elevados polo conselleiro ou conselleira competente en materia de cooperación para o desenvolvemento ao Consello da Xunta para a súa aprobación.

b) Informar ao Consello da Xunta, a través do conselleiro ou conselleira competente, sobre o grao de execución do Plan director vixente e dos plans de acción anuais que o desenvolven.

c) Remitir anualmente ao Parlamento de Galicia un informe sobre o grao de execución do Plan director vixente e do Plan de acción anual.

3. Son tamén competencias deste departamento:

a) A coordinación das iniciativas e actuacións de cooperación para o desenvolvemento que leven a cabo os diferentes departamentos e organismos da Xunta de Galicia. Estas actuacións deberán estar guiadas polo principio de coherencia e axustarse ás prioridades e resultados previstos no Plan director vixente e nos plans de acción anual.

b) A coordinación coa Administración Xeral do Estado e, en particular, cos seus órganos e axencias de xestión da cooperación para o desenvolvemento.

c) A harmonización horizontal das súas actuacións coas restantes administracións autonómicas que conforman a cooperación descentralizada do Estado.

d) A coordinación coas entidades locais galegas que realizan, no ámbito das súas competencias, actuacións de cooperación para o desenvolvemento.

e) A emisión dos informes sobre a complementariedade e coordinación das actuacións de cooperación para o desenvolvemento promovidas polos entidades locais que estableza a lexislación vixente.

- f) A dirección dos traballos resultantes das actuacións derivadas da cooperación bilateral e multilateral.
 - g) O seguimento, inspección e avaliación das actuacións financiadas con fondos da Xunta de Galicia ou cofinanciadas por outras entidades públicas ou privadas.
 - h) A interlocución e colaboración cos axentes de cooperación.
 - i) A elaboración e proposta ao Consello da Xunta dos regulamentos necesarios para garantir a aplicación deste título.
4. O centro directivo competente en materia de cooperación para o desenvolvemento dotarase dos medios humanos, materiais e orzamentarios axeitados para cumprir as funcións que ten encomendadas.

Artigo 84. Consello Galego de Cooperación para o Desenvolvemento

1. O Consello Galego de Cooperación para o Desenvolvemento é o órgano de consulta e participación da sociedade galega en materia de cooperación para o desenvolvemento.
2. O Consello estará adscrito ao centro directivo competente en materia de cooperación para o desenvolvemento.
3. O Consello Galego de Cooperación para o Desenvolvemento ten as seguintes funcións:
 - a) Coñecer os proxectos de normas en materia de cooperación para o desenvolvemento.
 - b) Coñecer e informar sobre a proposta dos plans directores e dos plans anuais de cooperación para o desenvolvemento, así como facer as propostas que coiden oportunas.
 - c) Coñecer os resultados do informe sobre o grao de execución do plan anual, a execución gradual e avaliación final do Plan director vixente.
 - d) Recibir información sobre as diferentes convocatorias públicas de axuda e outros instrumentos de financiamento da Xunta de Galicia para actuacións de cooperación para o desenvolvemento.

e) Elaborar por iniciativa propia todo tipo de informes e propostas que contribúan a mellorar a calidade da Cooperación Galega para o desenvolvemento, sempre que a devandita iniciativa sexa acordada pola maioría das persoas integrantes do mesmo.

f) Aprobar o regulamento de funcionamento do Consello.

4. O Consello Galego de Cooperación para o Desenvolvemento estará formado polas persoas determinadas regulamentariamente en representación dos axentes de cooperación. No proceso de nomeamento das persoas integrantes do Consello promoverase unha representación paritaria de mulleres e homes. Integran tamén o Consello, coma vogais independentes, persoas expertas en cooperación para o desenvolvemento que serán elixidas por maioría cualificada das persoas representantes dos axentes de cooperación. O seu número establecerase por vía regulamentaria.

5. Na regulación da composición do Consello Galego de Cooperación para o Desenvolvemento, a Xunta de Galicia deberá ter en conta o protagonismo nesta materia das organizacións non gobernamentais para o desenvolvemento. As persoas representantes destas organizacións serán propostas pola Coordinadora Galega de Organizacións non Gobernamentais para o Desenvolvemento ou polas entidades análogas ou sucesoras desta.

6. A composición do Consello Galego de Cooperación para o Desenvolvemento garantirá a participación na súa actividade da Administración local e das institucións que as integren e as organizacións que as representan.

7. O Pleno do Consello Galego de Cooperación para o Desenvolvemento poderá constituír comisións e grupos de traballo que sirvan de apoio á realización das funcións que lle asigna esta lei. Na composición das comisións procurarase respectar a proporcionalidade e a presenza dos distintos grupos de axentes de cooperación que integran o Consello. Nos grupos de traballo non será precisa a devandita proporcionalidade.

CAPÍTULO IV

Recursos e financiamento da Cooperación Galega

Artigo 85. Persoal da administración autonómica

1. A actividade da Administración autonómica en materia de cooperación para o desenvolvemento será levada a cabo principalmente polo persoal adscrito ao centro directivo competente na materia.

2. O persoal funcionario de carreira, estatutario e laboral fixo ao servizo das administracións públicas da Comunidade Autónoma poderá participar en tarefas e actuacións de cooperación para o desenvolvemento promovidas directamente por estas administracións ou promovidas por organizacións non gobernamentais de desenvolvemento, universidades e centros de investigación públicos, organizacións internacionais ou outras administracións públicas.

3. O persoal funcionario de carreira ou estatutario que participe en actuacións de cooperación para o desenvolvemento por un período superior a seis meses encontrárase nunha situación de servizos especiais. Se o período fose igual ou inferior a seis meses poderá outorgárselle unha comisión de servizos. Nos casos nos que non proceda a concesión dunha comisión de servizos, poderán concederse licenzas, sempre que conste o interese público, estean subordinadas ás necesidades do servizo e se desenvolvan nos termos previstos regulamentariamente.

4. O persoal laboral que participe en actuacións de cooperación para o desenvolvemento rexeráse polo disposto no seu correspondente convenio colectivo de aplicación.

5. As administracións públicas da Comunidade Autónoma promoverán e facilitarán, no marco da normativa de función pública e laboral aplicable, a participación do seu persoal en actuacións de cooperación para o desenvolvemento, en particular nos supostos nos que o labor deste persoal aporte un valor engadido, tendo en conta a súa cualificación técnica e experiencia nos obxectivos e resultados da actuación na que vaian participar.

6. Os costes de persoal derivados de participar en actuacións de cooperación internacional para o desenvolvemento e acción humanitaria promovidas ou cofinanciadas pola Administración xeral da Comunidade Autónoma de Galicia e as entidades públicas instrumentais do sector público autonómico de Galicia enunciadas na letra a) do artigo 45 da Lei 16/2010, do 17 de decembro deberán ser asumidos polo departamento ao que pertenza o devandito persoal e poderán ser computados como axuda oficial ao desenvolvemento.

Artigo 86. *Recursos económicos*

1. A Lei de orzamentos fixará anualmente os créditos destinados á cooperación para o desenvolvemento na Comunidade Autónoma de Galicia, tomando como referencia as previsións indicativas do Plan director vixente.

2. Os recursos destinados a cooperación para o desenvolvemento poderán aumentarse con achegas doutros organismos e institucións nacionais e internacionais, públicos e privados, e de persoas físicas ou xurídicas.

3. Os créditos orzamentarios consignados nos programas de cooperación para o desenvolvemento que non sexan executados dentro do exercicio orzamentario correspondente poderán incorporarse de xeito adicional á mesma partida dos orzamentos do exercicio seguinte nos termos establecidos na normativa vixente.

Artigo 87. Financiamento e control

1. A Administración autonómica poderá celebrar acordos destinados a financiar a execución de actuacións de cooperación para o desenvolvemento con organizacións multilaterais de desenvolvemento, axencias das Nacións Unidas e os seus comités estatais, fondos globais non financeiros de desenvolvemento e a Unión Europea, así coma con outras institucións públicas ou privadas, nacionais ou estranxeiras, ben a través dos instrumentos previstos no Título VI desta lei ou ben mediante convenios de carácter administrativo, e sempre e cando as actuacións derivadas destes acordos se axusten aos principios e obxectivos formulados neste título e ás prioridades e resultados do Plan director vixente.

2. Tamén poderá financiar a través de subvencións e axudas sometidas aos principios de publicidade e concorrência aquelas actuacións dos axentes de cooperación que satisfagan os requisitos establecidos neste título e se axusten ás directrices establecidas polo Plan director vixente. As bases das convocatorias deberán definir os prazos máximos para a valoración, resolución e informes de xustificación das subvencións concedidas. Os procesos e prazos deberán ser adecuados e adaptarse ás distintas realidades e instrumentos de cooperación existentes.

3. As subvencións no ámbito da cooperación para o desenvolvemento adecuaranse ao réxime xeral establecido na Lei 9/2007, do 13 de xuño, de subvencións de Galicia. En calquera caso, ás subvencións nesta materia seranlle de aplicación as seguintes especificidades:

a) As subvencións serán abonadas anticipadamente ao 100% e sen necesidade de presentar garantías, salvo que as bases reguladoras específicas das convocatorias establezan o contrario.

b) No caso de subvencións plurianuais as bases reguladoras poderán determinar unha porcentaxe de execución a partir da cal se poderá solicitar o pagamento das seguintes anualidades.

c) O prazo, inicialmente previsto, de execución das actuacións de cooperación para o desenvolvemento ou acción humanitaria financiadas ou subvencionadas pola Xunta de Galicia poderá ser prorrogado automaticamente ata un máximo de 6 meses, sen necesidade de autorización previa, debendo comunicalo ao órgano xestor antes de que expire o prazo de execución inicial, sendo indistinto que se exceda o límite do correspondente exercicio orzamentario. Poderase solicitar unha segunda prórroga antes de que expire a primeira fundamentada en situacións ou fenómenos excepcionais e imprevisibles, como desastres naturais, enfrontamentos armados, crises humanitarias, actuacións retardatarias das autoridades locais ou outras continxencias análogas, que afecten de maneira directa á execución da actuación financiada ou subvencionada, que deberán acreditarse de forma fidedigna e sempre que non concorran circunstancias imputables á entidade beneficiaria.

d) O prazo para a xustificación da realización da actuación subvencionada será de tres meses dende a data de finalización da mesma, con independencia que se exceda o exercicio orzamentario correspondente, salvo que as bases reguladoras específicas das convocatorias establezan o contrario.

e) En casos excepcionais, de producirse situacións ou fenómenos imprevisibles, como desastres naturais, enfrontamentos armados, crises humanitarias, actuacións retardatarias das autoridades locais ou outras continxencias análogas, que afecten de maneira directa a execución da actividade financiada ou subvencionada, e que dificulten ou mesmo imposibiliten dispoñer da adecuada documentación xustificativa do investimento ou do gasto, o órgano xestor poderá aceptar outras formas alternativas de xustificación, como informes de profesionais taxadores independentes e debidamente acreditados e inscritos no correspondente rexistro oficial, declaracións de testemuñas, avaliación por resultados realizada por un profesional verificador acreditado e independente, declaración responsable de provedores ou declaración responsable da entidade beneficiaria en que se detalle o destino dos fondos públicos percibidos e a realización da acción concreta, así como a súa afectación ao bo fin perseguido, ou outras probas de igual valor e credibilidade, sen que sexa preciso achegar máis xustificantes. Asemade se estas causas dificultan ou imposibilitan a execución total do previsto, o reintegro ou a perda do dereito ao cobramento da axuda ou subvención non afectará ás cantidades efectivamente investidas ou aboadas se se cumpriron parcialmente os obxectivos.

4. Co obxecto de lograr unha maior eficiencia na xestión dos fondos públicos destinados á cooperación para o desenvolvemento, nas bases reguladoras poderán establecerse adaptacións das normas xerais do réxime financeiro e orzamentario. Nese senso, o financiamento público das actuacións de cooperación para o desenvolvemento ou acción humanitaria serán considerados, en termos orzamentario, como gasto corrente, independentemente da natureza dos gastos e financiaranse con transferencias correntes.

Artigo 88. *Réxime fiscal das achegas efectuadas a organizacións non gobernamentais para o desenvolvemento e a proxectos de cooperación para o desenvolvemento*

1. As achegas efectuadas por persoas físicas ou xurídicas a organizacións non gobernamentais de desenvolvemento así como para a realización de actuacións de cooperación para o desenvolvemento nos seus diversos ámbitos recibirán o tratamento fiscal previsto na súa normativa reguladora.

2. A Comunidade Autónoma de Galicia poderá regular outros incentivos fiscais que favorezan a participación privada en actuacións de cooperación para o desenvolvemento promovidas polas administracións públicas, as organizacións non gobernamentais de desenvolvemento e o resto de axentes sen ánimo de lucro inscritos no Rexistro galego de axentes de cooperación. Estes incentivos regularanse mediante norma con rango de lei.

CAPÍTULO V

Axentes de cooperación

Artigo 89. *Axentes da cooperación para o desenvolvemento*

1. Aos efectos deste título, considéranse axentes de cooperación aquelas entidades, de carácter público ou privado, cunha vinculación específica cos obxectivos, prioridades, modalidades e ámbitos da cooperación para o desenvolvemento.

2. Os axentes de cooperación son recoñecidos como interlocutores das administracións públicas da Comunidade Autónoma nesta materia.

3. Aos efectos deste título, considéranse axentes galegos de cooperación os seguintes:

a) A administración autonómica, o seu sector público dependente e as entidades locais recoñecidas pola Lei 5/1997, do 22 de xullo, de Administración local de Galicia, así como as institucións que as integren e as organizacións que as representan.

b) Organizacións non gobernamentais para o desenvolvemento.

c) Universidades do Sistema Universitario Galego e centros de investigación públicos.

d) Axencias das Nacións Unidas e os seus comités estatais ou organizacións que as representen en España.

e) Cooperativas, empresas e asociacións empresariais.

f) Organizacións sindicais.

g) Comunidades galegas no exterior.

h) Outros axentes sociais ou entidades que teñan entre os seus fins a realización de actividades de cooperación para o desenvolvemento.

4. Os axentes privados de cooperación enumerados nas letras b, e, f, h do apartado anterior deberán cumprir cos seguintes requisitos comúns para seren recoñecidos como tales pola Administración autonómica:

a) Estar legalmente constituídos consonte á lexislación española.

b) Gozar de plena capacidade xurídica e de obrar e dispoñer dunha estrutura de recursos humanos e económicos que garantan o cumprimento dos seus fins.

c) Ter sede social ou delegación permanente na Comunidade Autónoma.

d) Estar inscritas na sección correspondente do Rexistro galego de axentes de cooperación para o desenvolvemento descrito no artigo 99.

e) Cumprir coa obrigas legais de bo goberno e transparencia que lle sexan de aplicación.

f) Non ter relacións de dependencia, directa ou indirecta, con administracións públicas ou entidades do sector público de tal xeito que os seus órganos de goberno non estean formados en máis dun 30% por persoas que actúen en representación das mesmas.

Artigo 90. Obrigas dos axentes de cooperación para o desenvolvemento

1. Os axentes galegos de cooperación que xestionen actuacións financiadas con fondos públicos da Administración pública da Comunidade Autónoma que computen como axuda oficial ao desenvolvemento deberán respectar os principios, obxectivos e prioridades deste título e do Plan Director vixente.

2. As entidades destinatarias de axudas públicas en materia de cooperación para o desenvolvemento facilitarán o control, seguimento, avaliación e verificación por parte do centro directivo competente da efectiva realización das actividades financiadas e cumprirán, no caso de entidades sometidas á lexislación galega ou española, coas

obrigas legais de transparencia e publicidade establecidas pola Lei 1/2016, do 18 de xaneiro, de transparencia e bo goberno.

3. As entidades destinatarias de axudas públicas en materia de cooperación para o desenvolvemento deberán respectar a lexislación estatal e internacional de dereitos humanos, traballo digno, igualdade laboral de homes e mulleres e prevención da explotación laboral infantil.

4. Os axentes de cooperación privados que sexan destinatarios de axudas públicas en materia de cooperación para o desenvolvemento deberán dotarse ou contar cos recursos humanos e técnicos necesarios para a xestión eficiente e eficaz do ciclo do proxecto e para o cumprimento das obrigas de xustificación establecidas na normativa de subvencións.

5. Os axentes de cooperación privados sometidos á lexislación española que contén un financiamento público superior ao 50% do seu orzamento anual terán a consideración de poderes adxudicadores e deberán cumprir coa regulación establecida na Lei estatal 9/2017, de 8 de novembro, de Contratos do Sector Público.

6. Os axentes de cooperación privados que pola súa natureza xurídica posúan ánimo de lucro poderán acceder a axudas públicas nesta materia mediante a certificación do seu compromiso de non obter ningún beneficio das actuacións financiadas. Complementariamente, estas entidades terán a obriga de encargar pola súa conta unha auditoría contable das intervencións financiadas con fondos públicos, aos que non se poderán imputar custos indirectos.

Artigo 91. *Entidades locais*

1. As entidades locais poderán desenvolver actuacións de cooperación para o desenvolvemento no exercicio das súas competencias promovendo a coordinación e complementariedade entre as administracións públicas e achegando un valor engadido especialmente naqueles ámbitos en que o municipalismo galego conta con experiencia e capacidades diferenciadas como a protección de dereitos sociais básicos, servizos sociais, urbanismo e ordenación do territorio, xestión pública dos recursos hídricos, xestión medioambiental, igualdade de xénero, educación para a cidadanía global ou calquera outro no marco das súas competencias.

2. As entidades locais e as institucións que as integren e as organizacións que as representan, como o Fondo Galego de Cooperación e Solidariedade, constitúense en interlocutores permanentes da Xunta de Galicia en materia de cooperación para o desenvolvemento.

Artigo 92. Organizacións non gobernamentais para o desenvolvemento

1. Aos efectos desta lei considéranse organizacións non gobernamentais para o desenvolvemento aquelas entidades que satisfagan os seguintes requisitos:

- a) Estar legalmente constituídas consonte ao dereito civil e ser organizacións sen ánimo de lucro.
- b) Establecer nos seus estatutos expresamente entre os seus fins a realización de actividades relacionadas cos principios, obxectivos e ámbitos da cooperación para o desenvolvemento e a solidariedade internacional.
- c) Respetar os códigos de conduta das organizacións non gobernamentais para o desenvolvemento ou calquera outro instrumento de autorregulación recoñecido polo sector.
- d) Contar con apoio e base social.

2. As organizacións non gobernamentais para o desenvolvemento e as organizacións que as representan, como a Coordinadora Galega de ONGD, constitúense en interlocutores permanentes da Xunta de Galicia en materia de cooperación para o desenvolvemento.

Artigo 93. Universidades do Sistema universitario galego e centros públicos de investigación

1. As universidades integradas no Sistema universitario galego e as súas entidades dependentes poderán desenvolver actuacións de cooperación para o desenvolvemento en todos os seus ámbitos e modalidades achegando un valor engadido e diferenciado con base na súa experiencia e capacidades en formación, investigación, xeración e transferencia de coñecemento, extensión e xestión universitaria, ben individualmente, ben a través das redes de traballo conxunto que promovan.

2. Os centros públicos de investigación radicados na Comunidade Autónoma poderán desenvolver actuacións de cooperación para o desenvolvemento a través da investigación aplicada e a xeración e transferencia de coñecemento nesta materia.

Artigo 94. Axencias das Nacións Unidas e os seus comités estatais, ou organizacións que as representen en España

1. As axencias das Nacións Unidas e os seus comités estatais, ou organizacións que as representen en España, poderán recibir axudas e subvencións das administracións públicas da Comunidade Autónoma en caso de que sexa necesario complementar as capacidades dos axentes galegos de cooperación nos sectores de actuación e colectivos en que están especializadas.

2. As administracións públicas da Comunidade Autónoma poderán subscribir convenios ou acordos con estas axencias ou outras organizacións internacionais para a formación de persoas expertas en cooperación para o desenvolvemento.

Artigo 95. Cooperativas, empresas e asociacións empresariais

As cooperativas, empresas e asociacións empresariais poderán desenvolver actuacións sen ánimo de lucro en materia de cooperación exterior para o desenvolvemento nos seus ámbitos de especialización produtivo e empresarial, no eido do investimento positivo e responsable, e na promoción da economía e emprendemento sociais, os negocios inclusivos e a responsabilidade social corporativa.

Artigo 96. Organizacións sindicais

As organizacións sindicais poderán desenvolver actuacións de cooperación exterior para o desenvolvemento nos seus ámbitos de especialización no eido do diálogo social e negociación tripartita, a promoción do traballo digno, a formación e capacitación profesional, a defensa dos dereitos laborais e o fomento de políticas de igualdade.

Artigo 97. Comunidades galegas no exterior

1. As comunidades galegas no exterior poderán realizar actuacións de cooperación para o desenvolvemento en países en vías de desenvolvemento, ben directamente cando teñan a súa sede social nun destes países e acrediten capacidade ou experiencia suficiente, ben a través de contrapartes ou socios locais. As comunidades galegas no exterior deberán estar inscritas no rexistro específico dependente do centro directivo con competencias en emigración exterior.

2. As actuacións financiadas nesta materia con fondos públicos das administracións públicas da Comunidade Autónoma non poderán ter como beneficiarias a persoas vinculadas, directa ou indirectamente, coas comunidades galegas no exterior.

Artigo 98. Outros axentes sociais ou entidades que teñan entre os seus fins a realización de actividades de cooperación para o desenvolvemento

Os axentes sociais ou entidades que teñan entre os seus fins a realización de actividades de cooperación para o desenvolvemento e non se correspondan aos axentes galegos de cooperación descritos nos artigos anteriores, poderán desenvolver actuacións sen ánimo de lucro en materia de cooperación para o desenvolvemento nos seus ámbitos de especialización.

Artigo 99. Rexistro galego de axentes de cooperación para o desenvolvemento

1. O Rexistro galego de axentes de cooperación para o desenvolvemento constitúese como un rexistro público adscrito ao centro directivo competente en materia de cooperación para o desenvolvemento, nos termos que regulamentariamente se determinen.

2. Neste rexistro poderán inscribirse os axentes de cooperación para o desenvolvemento enumerados nas letras b, e, f, e h do apartado 3 do artigo 89 deste título que cumpran os requisitos establecidos regulamentariamente.

3. A inscrición no rexistro é voluntaria. Con todo, para os axentes enumerados no apartado anterior a inscrición será requisito obrigatorio aos efectos de solicitar axudas e subvencións públicas en réxime de concorrencia competitiva no ámbito da cooperación para o desenvolvemento da Administración xeral da Comunidade Autónoma de Galicia e das entidades públicas instrumentais do sector público autonómico. As bases reguladoras da concesión de subvencións poderán establecer requisitos específicos relativos á inscrición no rexistro

CAPÍTULO VI

Outros suxeitos

Artigo 100. Persoal cooperante

1. Aos efectos desta lei, enténdese por cooperante a aquela persoa física que participe na execución de actuacións de cooperación para o desenvolvemento ou acción humanitaria en países empobrecidos ou en vías de desenvolvemento e teña unha relación xurídica co axente de cooperación promotor da actuación.
2. A persoa cooperante deberá estar ligada co axente de cooperación por algunha das seguintes relacións xurídicas:
 - a) Relación sometida ao ordenamento xurídico laboral.
 - b) Relación funcional ou de persoal ao servizo das administracións públicas.
3. Non será considerada cooperante a persoa que teña unha relación co axente de cooperación de arrendamento civil ou mercantil de servizos ou estea a gozar de bolsas públicas ou privadas de formación ou para a realización de prácticas non remuneradas en países empobrecidos ou en vías de desenvolvemento.
4. A regulación deste persoal rexerase polo establecido na norma estatal sobre o Estatuto do cooperante, pola normativa en materia de función pública e polo Estatuto dos Traballadores e demais lexislación laboral vixente.

Artigo 101. *Persoal voluntario no ámbito da cooperación para o desenvolvemento*

1. Aos efectos desta lei, enténdese por persoa voluntaria a toda aquela persoa física que, en virtude da súa decisión persoal, libre e altruísta e mais nunha situación de inexistencia de relación laboral, mercantil ou de traballo remunerado, participa nunha actuación de cooperación para o desenvolvemento, ben sexa na Comunidade Autónoma ou en países empobrecidos e en vías de desenvolvemento, promovida por unha entidade de acción voluntaria coa que teña subscrito un compromiso de colaboración.
2. Naqueles supostos nos que a acción voluntaria realizada no ámbito da cooperación para o desenvolvemento implique a expatriación da persoa voluntaria, o compromiso de colaboración que deben subscribir as persoas voluntarias e as entidades nas que se integren reflectirá, ademais do contido mínimo previsto na lexislación aplicable, os seguintes aspectos:
 - a) O país ou territorio no que a persoa voluntaria realizará a súa labor, incluíndo o lugar a onde debe dirixirse á súa chegada.
 - b) As condicións médicas e de vacinación previstas e que debe adoptar a persoa voluntaria antes, durante e despois de realizar o seu labor.

c) As normas de seguridade básicas no país de destino e os recursos a empregar naqueles supostos nos que a seguridade da persoa voluntaria se vexa comprometida.

d) As formalidades administrativas que debe cumprir para poder entrar, residir, desenvolver o seu labor e saír do país de destino en calidade de persoa voluntaria.

e) Os seguros de asistencia sanitaria e repatriación concertados, en termos similares aos previstos para as persoas cooperantes.

3. Non serán consideradas actuacións de voluntariado no ámbito da cooperación para o desenvolvemento aquelas actividades de turismo solidario, ecoturismo, turismo sustentable ou calquera outra con denominación similar que teñan como finalidade fundamental o desprazamento por razóns de lecer ou descanso a un país empobrecido ou en vías de desenvolvemento.

4. En todo aquilo non previsto neste artigo, resultará de aplicación supletoria a Lei 10/2011, do 28 de novembro, de acción voluntaria.

TÍTULO IX

Delegacións e oficinas públicas no exterior

CAPÍTULO I

Delegacións e oficinas públicas permanentes no exterior

Artigo 102. *Delegacións e oficinas exteriores autonómicas*

1. Terán a consideración de delegacións exteriores da Xunta de Galicia aquelas unidades administrativas radicadas fóra do territorio español que representen á Xunta de Galicia na súa integridade dentro do espazo xeográfico de referencia que se determine no seu acto de creación.

2. As delegacións exteriores da Xunta serán creadas por decreto do Consello da Xunta de Galicia por proposta da consellería na que se encadre o centro directivo responsable de velar polo desenvolvemento e execución da Egaex e que exerza as competencias fundamentais de acción exterior na Administración autonómica, da cal dependerán para todos os efectos relacionados coa súa xestión. Esta consellería velará pola idoneidade da actuación e dará curso do antedito proxecto de decreto ao

Ministerio competente en asuntos exteriores, segundo prevé a Lei 2/2014, do 25 de marzo, da acción e do servizo exterior do Estado.

3. Terán a consideración de oficinas exteriores as instalacións de traballo impulsadas por un ente xurídico-público autonómico dotado de personalidade propia, servidas por persoal directamente contratado polo devandito ente, sexa baixo réxime administrativo, laboral ou mercantil, de dereito español ou estranxeiro, e que acrediten a súa condición mediante a correspondente placa harmonizada coa imaxe institucional da Xunta de Galicia, cuxa instalación debe autorizar previamente e en todo caso a consellería na que se encadre o centro directivo responsable de velar polo desenvolvemento e execución da Egaex e que exerza as competencias fundamentais de acción exterior.

4. As oficinas exteriores serán creadas mediante o correspondente acordo do ente xurídico- público que as impulse, previamente autorizadas por orde da consellería que exerza a tutela ou control sobre o referido ente, de cuxo proxecto dará conta á consellería na que se encadre o centro directivo responsable de velar polo desenvolvemento e execución da Egaex e que exerza as competencias fundamentais de acción exterior, que informará sobre a súa idoneidade e correspondencia coa Egaex, e tamén dará curso do proxecto ao Ministerio competente en asuntos exteriores, segundo prevé a Lei 2/2014, do 25 de marzo, da acción e do servizo exterior do Estado. Tras os trámites oportunos e dispoñendo dos informes preceptivos, a devandita orde de creación dunha oficina exterior será publicada no Diario Oficial de Galicia.

5. Non terán a consideración de oficinas de representación exterior os locais legalmente utilizados por meros axentes de promoción comercial ou de captación de investimentos, contratados especificamente para iso polo correspondente ente xurídico-público autonómico dotado de personalidade, sempre que os devanditos contratos se realizasen ao abeiro do ordenamento do Estado onde aqueles axentes teñan que realizar as súas xestións mercantís.

6. Tampouco terán a consideración de oficinas exteriores autonómicas as instalacións que ocupen axentes de promoción comercial ou de captación de investimentos ao servizo de intereses galegos que fosen contratados ou comisionados por entidades galegas de dereito privado que dispuxesen dalgunha axuda ou subvención autonómica para tal fin, debendo detallarse no acto de concesión da correspondente axuda ou subvención esta circunstancia.

7. Os entes xurídico-públicos autonómicos dotados de personalidade que manteñan oficinas exteriores ou realicen contratos en favor de axentes de promoción comercial ou de captación de investimentos informarán, ademais, en todo caso a consellería na que se encadre o centro directivo responsable de velar polo desenvolvemento e

execución da Egaex e que exerza as competencias fundamentais de acción exterior na Administración autonómica, con anterioridade á perfección deses contratos ou á apertura desas oficinas, remitindo un informe anual sobre o balance das actividades desenvolvidas.

8. Cando o ministerio competente ofrezca á Xunta de Galicia a posibilidade e dispoñibilidade de instalar aquelas delegacións ou oficinas dentro dos locais do Servizo Exterior do Estado ou doutras dependencias de titularidade pública española no exterior, a Xunta avaliará a idoneidade das condicións ofrecidas e dos custos que leve consigo o devandito ofrecemento nun prazo non superior a tres meses, transcorrido o cal se dará por desestimado o referido ofrecemento. Este prazo suspenderá o seu cómputo por un período non superior a outros tres meses se ambas as dúas administracións entran en negociacións para buscar alternativas físicas, xurídicas e/ou económicas que satisfagan as necesidades galegas para a futura delegación ou oficina. Exceptuarase a aplicabilidade deste apartado ás oficinas e locais empregados por axentes de promoción comercial ou de captación de investimentos dos números 5 e 7 deste artigo, se os profesionais que resulten adxudicatarios destas promocións ou captación de investimentos tiveren sede ou espazos propios para realizar estas actividades neses países.

Artigo 103. *Funcionamento das delegacións exteriores da Xunta de Galicia*

1. Son funcións das delegacións da Xunta no exterior, naquelas materias en que a Comunidade Autónoma teña a competencia atribuída, integrando sempre a dimensión de igualdade de oportunidades entre as mulleres e os homes:

a) Dar soporte ás altas autoridades da Comunidade Autónoma de Galicia e restantes actores ou suxeitos públicos da acción exterior galega no exercicio das súas atribucións, tanto nos seus desprazamentos á área xeográfica de referencia de cada delegación como realizando as xestións que aqueles lle encomenden.

b) Apoiar todas as actuacións dos departamentos autonómicos na área xeográfica de acción, de acordo coas directrices emanadas destes, co fin de canalizar e asegurar a colaboración oportuna naquelas materias da súa competencia.

c) Realizar estudos e informes de interese para Galicia sobre a situación e perspectivas da área xeográfica de referencia asignada.

d) Fomentar as relacións de Galicia coas institucións e órganos de goberno da súa área xeográfica de acción.

e) Impulsar as accións de promoción da cultura e lingua galegas, mantendo os nexos de galeguidade alí onde houber comunidades galegas establecidas.

- f) Prestar apoio administrativo e institucional ás persoas emigrantes galegas e ás comunidades galegas no exterior. Deste xeito, estas delegacións terán a responsabilidade da coordinación, xestión e difusión, así como o control, seguimento e información dos programas dirixidos á emigración e ó retorno.
- g) Prestar apoio ás accións de cooperación que, dentro da Acción Exterior de Galicia, a Xunta estableza no ámbito socioeconómico e de promoción do turismo.
- h) Colaborar no seguimento e avaliación dos plans, programas e proxectos de cooperación para o desenvolvemento que se realicen na área xeográfica asignada.
- i) Prestar asistencia técnica, orientación e información sobre Galicia e sobre a área xeográfica asignada aos axentes sociais alí situados, aos/as galegos/as, aos seus descendentes, ás comunidades galegas que os/as representan e ás persoas interesadas que respectivamente llelo demanden.
- j) Desempeñar as atribucións que lle sexan delegadas ou encomendadas polos órganos e entidades dependentes da Xunta de Galicia.
- k) Calquera outra función e tarefa que lle sexan asignadas, sempre que resulten compatibles co obxecto especificado nesta Lei.

2. Á fronte de cada delegación exterior haberá unha persoa titular nomeada polo Consello da Xunta de Galicia, por proposta da consellería que exerza as competencias fundamentais de acción exterior na Administración autonómica.

3. As delegacións estrutúranse nas áreas funcionais que se establezan no seu decreto de creación, respectando en todo caso o principio de unidade de acción baixo as ordes directas da persoa titular da delegación, quen exercerá a xefatura do persoal, así como as competencias que lle sexan delegadas ou encomendadas.

4. A persoa titular da delegación velará polo cumprimento das directrices emanadas da Xunta de Galicia, transmitidas a través da consellería na que se encadre o centro directivo responsable de velar polo desenvolvemento e execución da Egaex e que exerza as competencias fundamentais de acción exterior na Administración autonómica, que establecerá as normas internas de funcionamento da delegación, de acordo coas instrucións que para tal efecto dite con esta finalidade a mesma consellería.

5. A persoa titular da delegación poderá contratar persoal local *in situ* sometido ao ordenamento do Estado onde estiver a sede, dentro dos límites que lle determine a consellería que exerza as competencias fundamentais de acción exterior na Administración autonómica. Será necesaria autorización previa dos centros directivos competentes en materia de función pública e orzamentos para proceder á contratación de persoal fixo ou temporal.

6. O persoal empregado público ao servizo da Xunta de Galicia, dos seus organismos autónomos e entes de dereito público desprazado ás delegacións exteriores terá dereito ás retribucións básicas e complementarias que lle corresponda no seu posto de orixe de acordo co seu corpo, grupo e categoría, sen prexuízo do dereito á percepción das indemnizacións, axudas de custo e aplicación de coeficientes por razón de servizo que poidan corresponderlle por residencia no estranxeiro.

7. En cada delegación exterior existirá unha oficina de rexistro da Administración da Comunidade Autónoma de Galicia.

CAPÍTULO II

Oficinas públicas temporais no exterior

Artigo 104. Establecemento de oficinas autonómicas temporais no exterior

1. A Xunta de Galicia e os seus entes instrumentais poderán establecer oficinas temporais no exterior, consonte co previsto no artigo 12 e concordantes da Lei 2/2014, do 25 de marzo, da acción e do servizo exterior do Estado, así como das restantes previsións do Ordenamento xurídico español e do vixente no territorio do Estado no que se instalen.

2. Enténdese por oficina pública temporal no exterior aquel inmovible no que se empresten ou coordinen tarefas de proxección exterior, apoio á exportación, captación de investimentos, difusión cultural ou universitaria, asistencia á diáspora galega, soporte administrativo a xestións relacionadas con acordos internacionais ou calquera outras actividades de relevancia e interese público relacionadas con competencias ou intereses lexítimos galegos, sen unha vocación de permanencia ou vencelladas a obxectivos limitados e efémeros.

3. O prazo máximo de mantemento dunha destas oficinas será de dous anos, prorrogables por un máximo de dous termos equivalentes.

4. As oficinas temporais exteriores serán creadas mediante o correspondente acordo do ente xurídico- público que as impulse, previamente autorizadas por orde da consellería que exerza a tutela ou control sobre o referido ente, de cuxo proxecto dará conta á consellería na que se encadre o centro directivo responsable de velar polo desenvolvemento e execución da Egaex e que exerza as competencias fundamentais de acción exterior, que informará sobre a súa idoneidade e correspondencia coa Egaex, e tamén dará curso do proxecto ao Ministerio competente en asuntos exteriores, segundo prevé a Lei 2/2014, do 25 de marzo, da acción e do servizo exterior do Estado.

Artigo 105. Establecemento doutras oficinas públicas temporais no exterior

1. As entidades públicas distintas da Xunta de Galicia previstas nesta Lei poderán igualmente establecer oficinas temporais no exterior, consonte coa normativa estatal e galega.
2. O prazo máximo de mantemento dunha destas oficinas será de dous anos, prorrogables por un máximo doutro termo equivalente.
3. A entidade promotora comunicará o seu propósito ao centro directivo responsable da execución da Egaex, que solicitará os informes que estime axeitados antes da súa remisión ao Ministerio competente en asuntos exteriores.
4. Á vista do que determine ese Ministerio, a entidade promotora recibirá comunicación do centro directivo responsable da execución do Egaex do que estime aquel, de xeito explícito ou por silencio administrativo.

TÍTULO X

Novas redes de intereses galegos no exterior

CAPÍTULO I

Asento de galegos no exterior

Artigo 106. Asento de galegos no exterior

1. Os cidadáns coa condición política de galegos consonte co artigo terceiro do noso Estatuto de Autonomía que se despracen ao exterior por máis dun ano, poderán

inscribirse de xeito voluntario no Asento de galegos do exterior (ASGE), dependente do centro directivo responsable do apoio á diáspora galega, consten ou non nos correspondentes censos consulares, para facilitar a realización de xestións administrativas coas administracións galegas e a constitución de redes de apoio, asistencia e difusión cultural.

2. Para a inscrición no ASGE abondará coa remisión por vía telemática do modelo que institúa a Administración autonómica. Unha vez cuberto ese modelo, o órgano xestor responsable do apoio á diáspora galega remitirá un correo electrónico e unha comunicación postal ao solicitante no seu enderezo foráneo, para verificar deste xeito a súa residencia no exterior. Na comunicación postal constará unha clave persoal, que deberá remitir o destinatario por vía telemática.

3. Os galegos inscritos no ASGE beneficiaranse do previsto para os procedementos de urxencia á hora de realizar trámites a distancia relacionados co eido educativo, sanitario e asistencial, como pode ser o acceso a rexistros públicos autonómicos, a emisión de certificados, a consulta do historial médico custodiado polo SERGAS ou a solicitude de copias de documentos oficiais expedidos pola Xunta de Galicia, así como para beneficiarse de procedementos de concesión de axudas, subvencións ou bolsas de estudo.

4. As xestións a distancia realizados polos galegos inscritos no ASGE estarán exentas de taxas e prezos públicos en xeral.

5. O ASGE estará protexido pola normativa europea e española de tratamento de datos persoais.

6. O centro directivo responsable do apoio ós galegos do exterior e ó retorno manterá o ASGE do xeito que prevea o correspondente regulamento.

Artigo 107. *Constitución de novas redes de galegos no exterior*

1. Os galegos asentados no ASGE poderán dar a súa autorización expresa ao órgano xestor da súa mantenza para estimular a constitución de redes de apoio mutuo en cada país ou territorio no que estivesen residindo.

2. As devanditas redes poderán ter personalidade xurídica ou non, tanto de dereito español como do dereito do país de asentamento. En calquera caso poderán ser beneficiarias de axudas ou subvencións consonte coa normativa galega vixente.

3. As redes así constituídas fomentarán o senso de fraternidade entre os cidadáns galegos e promoverán a lingua e cultura galegas no seu entorno.

CAPÍTULO II

Empresas galegas no exterior

Artigo 108. Identificación das empresas galegas no exterior e constitución de redes

1. A entidade autonómica promotora do comercio exterior e as cámaras de comercio poderán convidar ás empresas e profesionais galegos radicados no exterior a constituír redes de asistencia, colaboración e apoio mutuo entre eles, así como para axudar a pares radicados en Galicia que poidan ter oportunidades de negocio onde xa estiveran asentados.
2. Para a constitución destas redes as empresas e profesionais haberán de inscribirse voluntariamente no Asento de empresas e profesionais galegos no exterior (ASEPGE).
3. As devanditas redes poderán ter personalidade xurídica ou non, tanto de dereito español como do dereito do país de asentamento. En calquera caso poderán ser beneficiarias de axudas ou subvencións consonte coa normativa galega vixente.

CAPÍTULO III

Rexistro de foráneos con intereses en Galicia

Artigo 109. Rexistro de foráneos con intereses en Galicia

1. A Xunta de Galicia creará un rexistro administrativo auxiliar de nacionais non españois residentes fóra de España que tivesen un especial vínculo ou afecto por Galicia. Este rexistro organizarase por seccións, en función das afinidades culturais, sociais, históricas ou económicas dos interesados e poderá acoller tanto a persoas físicas como xurídicas.
2. Os interesados poderán ser convidados a se inscribir neste rexistro ou solicitalo por iniciativa propia. En todo caso deberán indicar con que entidades ou galegos manteñan una fluída relación cultural, social, histórica ou económica.
3. A Xunta de Galicia poderá solicitar informes ou pareceres aos inscritos neste rexistro sobre iniciativas ou proxectos que estime axeitados para potenciar a imaxe da Comunidade Autónoma no exterior.

4. Os inscritos neste rexistro poderán ser beneficiarios de axudas de custo e doutras axudas e subvencións autonómicas.

Disposición adicional primeira. *Fundación Galicia Europa*

1. A Fundación Galicia Europa, entidade sen ánimo de lucro e ente instrumental do sector público autonómico galego que opera, ademais sometida ao dereito local foráneo onde desenvolve as súas actividades, ten o mandato da Xunta de Galicia para exercer a representación autonómica galega ante as institucións e órganos da Unión Europea, seguindo as directrices do Goberno autonómico e respectando os principios de unidade de acción exterior do Estado. A Fundación dependerá orgánica e funcionalmente do centro directivo responsable de velar polo desenvolvemento e execución da Egaex.

2. En cumprimento dos seus fins fundacionais, a Fundación Galicia Europa serve o interese xeral de Galicia, o seu fortalecemento institucional, o fomento da súa economía produtiva e social e a promoción de todas aquelas accións que acheguen Galicia á realidade europea, defendendo os seus intereses ante as institucións e órganos da Unión e difundindo os valores europeos entre a sociedade galega.

3. A Fundación Galicia Europa prestará apoio aos distintos departamentos e entidades da Xunta de Galicia, así como ás restantes administracións públicas, organismos e corporacións galegas, no exercicio da súa participación nos asuntos

da Unión, e colaborará na preparación de viaxes e visitas institucionais das autoridades de Galicia ás institucións e órganos da Unión, así como das autoridades das citadas institucións e órganos a Galicia.

4. No ámbito da defensa dos intereses galegos no proceso de toma de decisións da Unión, a Fundación Galicia Europa colaborará co resto de oficinas autonómicas e rexionais en Bruxelas así como coa Representación Permanente de España ante a Unión Europea (Reper) e cos deputados/as galegos/as no Parlamento Europeo. Así mesmo, respectando a repartición constitucional e estatutaria de competencias, poderá adoptar iniciativas ou estratexias e chegar a acordos con outras rexións ou institucións e órganos europeos que permitan a Galicia influír naquelas decisións da Unión que máis afecten os seus intereses.

5. No marco da normativa vixente en materia de función e emprego públicos, cando nas oficinas da Fundación Galicia Europa, sitas en Galicia e en Bruxelas-Bélxica ou noutros países da Unión distintos de España, existan necesidades específicas do servizo, conxunturais ou motivadas polo aumento do volume de traballo que requiran reforzar as súas actuacións, a Xunta de Galicia poderá trasladar voluntaria e motivadamente persoal funcionario ou laboral propio en comisión de servizos por unha duración de seis meses, prorrogable excepcionalmente por outros seis no caso de que se manteñan as referidas necesidades de reforzamento.

6. Cando no cadro de persoal da Fundación Galicia Europa non existan efectivos abondos para atender situacións extraordinarias, o titular do centro directivo responsable de velar polo desenvolvemento e execución da Egaex poderá autorizar ao persoal funcionario ou laboral adscrito ao seu centro directivo e especializado en asuntos europeos a acudir voluntariamente en apoio das devanditas tarefas da Fundación. O desprazamento temporal e voluntario dese persoal á oficina da Fundación Galicia Europa en Bruxelas ou a outras dependencias foráneas efectuarase por un período máximo de seis meses, prorrogable por outros seis. Para todos os efectos, considerarase que este persoal continúa en servizo activo nos seus postos de orixe e co recoñecemento da súa condición de expatriados a cargo da Fundación Galicia Europa.

Disposición adicional segunda. *Apoios extraordinarios ás delegacións exteriores da Xunta de Galicia*

Cando necesidades extraordinarias e imprevisibles, que obedezan á conxuntura da área xeográfica onde desenvolvan as súas actividades as delegacións ou oficinas exteriores da Xunta de Galicia, aconsellen reforzar temporalmente o traballo destas delegacións ou oficinas, poderase recorrer aos mecanismos de reforzamento

previstos para a Fundación Galicia Europa nos puntos 5 e 6 da anterior disposición adicional.

Disposición adicional terceira. *Participación do persoal do Servizo Galego de Saúde (Sergas) en emerxencias humanitarias baixo os parámetros do réxime do voluntariado sanitario internacional*

En desenvolvemento da Disposición adicional terceira da Lei estatal 45/2015, de 14 de outubro, de Voluntariado, recoñécese ao persoal que presta servizo no Sergas o dereito a desfrutar dun permiso non retribuído, cunha duración ordinaria de tres meses que pode ser ampliado de xeito extraordinario ata os seis, para participar en emerxencias de carácter humanitario. Esta configuración do permiso é compatible co carácter habitualmente profesional e remunerado da actividade de cooperación en emerxencias humanitarias. Durante a vixencia do permiso o profesional manterá a reserva de praza e será considerado en situación de servizo activo. A concesión das licenzas reguladas nesta Disposición adicional está subordinada, en todo caso, ás necesidades do servizo.

Disposición adicional cuarta. *Compromisos orzamentarios*

No marco das achegas do Estado ao cumprimento da axenda global de desenvolvemento humano sustentable das Nacións Unidas, a Xunta de Galicia tenderá progresivamente a destinar o 0,7% do seu orzamento consolidado a políticas vinculadas á cooperación para o desenvolvemento. Este compromiso queda supeditado ás dispoñibilidades reais da Facenda Pública da Comunidade Autónoma de Galicia, ao cumprimento dos compromisos existentes en materia de estabilidade orzamentaria e sustentabilidade financeira e aos escenarios orzamentarios plurianuais.

Disposición transitoria primeira. *Coeficientes por razón de servizo no exterior*

En tanto non se regulan os coeficientes por razón de servizo que poidan corresponder ao persoal da Xunta de Galicia por residencia no estranxeiro, aplicaranse supletoriamente os que están establecidos no ámbito da Administración xeral do Estado.

Disposición transitoria segunda. *Elaboración da primeira Estratexia galega de acción exterior tras a aprobación da presente Lei*

A primeira Estratexia Galega de Acción Exterior (Egaex) que se elabore logo da aprobación desta Lei haberá ser aprobada durante a lexislatura subseguinte á mesma.

Disposición derogatoria única

Quedan derogadas todas cantas normas de igual ou inferior rango se opoñan ao establecido nesta lei e, en particular, a Lei 3/2003, do 19 de xuño, de cooperación para o desenvolvemento.

En tanto non se aprobe o regulamento executivo da presente Lei manterase en vigor o Decreto 178/2015, do 26 novembro, polo que se regula a acción exterior da Comunidade Autónoma de Galicia, no que non colisione cos preceptos desta Lei.

Disposición derradeira primeira. *Habilitación normativa*

Facúltase o Consello da Xunta para ditar as disposicións regulamentarias necesarias para o axeitado desenvolvemento desta lei.

Disposición derradeira segunda. *Entrada en vigor*

Esta lei entrará en vigor aos vinte días da súa publicación no Diario Oficial de Galicia.

Santiago de Compostela, xx de zzzzzz de 2019

Alberto Núñez Feijóo

Presidente

Anteproxecto

